

# MARK

## *Warefa'aia*

Feni Bu'uu Mark na rapu ale'eni, “Feni, fafasuii feni rawani'a wareaa Jesus Christ, mei Na'uu mei Haidaa.” Mark na fama'aia ba Jesus pa'aa weweaa rama'a ma ana na pa'i foraforana. Fei foraforana na fama'aia a'a ei feroiana, fei faufauna, fei ba ina muainaa ei pigea ma fei ba i futoaa hafelo'aa ei rama'a.

Watauda ne'iaa Mark fi warewareaa ei bigi'aa Jesus. Ina u'ugaa fei pudugufaiana, fei manimaniana, ei feroiana ma farawaniana funua. I dii, ei nenerana ronawe apa'ia, ma'uaa na apoi'ualao fei sibaa ei bidibidii ununa.

Na fapo'inaa fei bu'una a'a ei a'apoo tatalaiaa Jesus yen'i malagufu, fei fatawana ma fei asi'anana. Guapaloei fapopo'ina, woro ne'iaa hefi'a.

*John, mei Pudugufaia na Ra'a'augaa fei Tala  
(Matthew 3:1-12; Luke 3:1-18; John 1:19-28)*

<sup>1</sup> Feni, fafasuii feni rawani'a wareaa Jesus Christ, mei Na'uu mei Haidaa.\*

<sup>2</sup> Ale'ei i ne'inia mei mamama'a Isaiah: “A aloaa mena otalai tonaa wareau i ma'amu ma i ra'a'augaa fena talamu”—

<sup>3</sup> “Na haroharo fei lao i podu.  
‘Ra'a'augaa fena talaa mena Fasu,  
ma fawanewane'augaa fena talana.’”

---

\* **1:1:** **1:1** Hefi'a ne'ia lomi na pa'i *mei Na'uu mei Haidaa*.

<sup>4</sup> Si'ei, John na nomai ma pudugufinaa ei rama'a i podu. Ina warefanaa ei rama'a ba ronei filoginaa naranaraa ro'ou ma pudugufai ma i futoaa ei hafelo'aa ro'ou, mei Fasu. <sup>5</sup> Minaa ei rama'a tadiwe'aiaa Judea ma Jerusalem, rona dinaa a'a John. Ei rona warefania ei hafelo'aa ro'ou, John na pudugufinaa ro'ou i laloo fei Ranu Jordan. <sup>6</sup> John na susuinaa fei susu, bigi'aa ro'odu hugo camel ma fei adina, hudii manulelele. Ma hanana, ena teraupu ma musilao podu. <sup>7</sup> Ma sifeni, feni wareana: “I pa'i hemea rama'a i nomai neneu, na faufaudiai ma na muainau. Yau ana lomi na rawani ba a fabalou ma alaraa fei hafenaa pinena. <sup>8</sup> Yau na pudugufinaa hamu'ou ranu† ma hia, i pudugufinaa hamu'ou fei Spiriti Apuna.”

*Fei Pudugufaia ma Manimaniaa Jesus  
(Matthew 3:13—4:11; Luke 3:21, 22; 4:1-13)*

<sup>9</sup> Ma fei au fei, Jesus noranamai Nazareth, yei Galilee. Ma John na pudugufinia laloo fei Ranu Jordan. <sup>10</sup> Ei fi asi'aa laloo fei ranu Jesus, na fanunuuaa fei gufu pafea na ba'agigi ma fei Spiriti fi falorogio pafona maumauna ale'e'i pune. <sup>11</sup> Ma fei haroharofa norai yei gufu pafea, na ware ale'e'i: “Yoi, mena na'uu, mena una haguio ma namina ni'eni'e a'amu.”

<sup>12</sup> Si'ei, fei Spiriti na alonaa Jesus i tau podu. <sup>13</sup> Jesus na guta laloo podu gunaroa pa'ania arewaa ma Satan ana fi manimania yei laloo podu. Jesus na guta hugiaa ei manulelele laloo podu ma ei alo'alo, rona oma'ama'aia yei.

---

† **1:8:** **1:8** O, laloo ranu

*Na Dugaa ei Rawarawa Otalai Nenera  
(Matthew 4:12-22; Luke 4:14, 15; 5:1-11)*

<sup>14</sup> Nenee fei ro aunaa John humuu bobo'aia, Jesus na dinaa Galilee, wareaa fei rawani'a warea noranarai a'a mei Haidaa. <sup>15</sup> Ina ware ba "Pa'aa feni auna feni. Fei haparaiaa mei Haidaa na rafi'i. Filoginaa naranaraa hamu'odu ma neneraa eni rawani'a warea!"

<sup>16</sup> Ei fi tatalai adii fei Agii Galilee Jesus, ina fanunupa'aa Simon ma mei lofuna, Andrew. Lagu'ei sumai lepo agi, uaa lagua dia'agi. <sup>17</sup> Jesus na warenaa a'a lagua, "Nomai ma nenerau. Ma a feroinaa hamugua tonaa rama'a ale'ena hamuna'o to nia." <sup>18</sup> Ana ei ua, laguna di'augaa ei lepoo lagua ma neneraa Jesus.

<sup>19</sup> Ei fi tatalaidilao ma'idadihai adii fei Agii Galilee, na fanunupa'aa laguei filofui James ma John, laguei na'uuh Zebedee. Lagu'ei hinu'aa ei lepoo lagua laloo fei wa. <sup>20</sup> Si'ei, na haro fawanewaneinaa lagua. Ma laguna di'ininaa mei amaa lagua, Zebedee mawe ei tameloi ro'ou laloo fei wa ma laguna nenegia.

*Jesus na Fawala'anaa Hepalo Spiriti Hafelo  
(Luke 4:31-37)*

<sup>21</sup> Rona aununaa Capernaum ma i nomai fei Sabbath, Jesus na dinaa laloo fei synagogue ma feroinaa ro'odu. <sup>22</sup> Ei rama'a, ronamina ba'arofo a'a ei feroiana, uaa na feroi ale'ei hemea na pa'i faufauna, abaa ale'ei ei feroiaa Law. <sup>23</sup> Ana ei ua, hemea rama'a laloo fei synagogue, mei na wadu'ia

spiriti hafelo,<sup>†</sup> na mewaiware, <sup>24</sup> “Tamanu ei nunumiamu a'a hai'odu, Jesus, mena Nazareth? Ei o nomai ba o fo'afama'eaa hai'odu? Una apa'ia ba yoi hini. Yoi, mena Apunaiaa mei Haidaa!”

<sup>25</sup> Jesus na ware, “Babanini ma wala'amai a'ana!” <sup>26</sup> Fei hafelo'a spiriti na nuenueinia ma memewai ma wala'aa a'ana.

<sup>27</sup> Ei rama'a, ronamina naranara watauda ma fi'iigai, “Tamanu feni? Hefeni manufau feroia na pa'i faufauna ma ei hafelo'a spiriti ana ronamina guaipa'aa wareana!” <sup>28</sup> Fei u'ugana namina tale-maduarenaa ei gufu pedu yei Galilee.

*Jesus na Farawaninaa Funuaa Watauda  
(Matthew 8:14-17; Luke 4:38-41)*

<sup>29</sup> Ei ro'aa di'ininaa fei synagogue, rona aunuhugiaa James ma John ma dinaa a'a fei gufuu Simon ma Andrew. <sup>30</sup> Mei inaa mei haroo Simon na funuhaino pafoo tawa. Ei rama'a yei, rona warefanaa Jesus ba na babai unuu mei rama'aa Simon. <sup>31</sup> Si'ei, Jesus na dinaa a'ana, tauaa panina ma fa'asi'ania. Fei funuana na pedu ma i dii, ina hasumaa ei hanaa ro'odu.

<sup>32</sup> Fei fafi fei, i lolo fei halo, ei rama'a rona dug-inamii a'a Jesus ei rama'a rona pa'i funuaa ro'ou pipui a'a ei na wadu'aa ro'odu pigea. <sup>33</sup> Minaa ei rama'a yei, ronamina oma'a ua papaa fei gigei. <sup>34</sup> Jesus na farawaninaa funuaa watauda ma alo-fatatalaina watauda pigea, ei rona wadu'aa ei rama'a. Ma ina apunaina ei pigea ba ronei'aa wareware; uatani, rona aida ba hia hini.

---

<sup>†</sup> **1:23: 1:23** Ware Greek ba *spiriti loloa*; vv. 26 ma 27 anaa

*Jesus na Lafulafu Fawelei Lomi Rama'a  
(Luke 4:42-44)*

<sup>35</sup> Mafufuo badu, atawe arewafarawani, Jesus na asi'a'aununaa fawelei lomi rama'a ba i lafulafu.

<sup>36</sup> Simon ma ei ro'ei tatalaifipui a'ana, rona aunu ma labaginia. <sup>37</sup> Ma ro'aa nobapa'alao, rona ware a'ana ba, "Minaa ei rama'a, roi lalabaginio!"

<sup>38</sup> Jesus na ware a'a ro'odu, "O dii. O aununaa ena gufu opa'anawau ma ana a u'u yena. Si'ena, ena a nogio." <sup>39</sup> Ma namina tatalai yei Galilee. Ina u'u laloo ei synagogue ro'ou ma alofatalaina ei pigea.

*Hemea Rama'a na Watawatai Ununa  
(Matthew 8:1-4; Luke 5:12-16)*

<sup>40</sup> Hemea watawatai§ na nomai a'ana, fa'unaa du'una ma i'iginia, "Na'aa inapo'o rawani a'amu, farawaninau."

<sup>41</sup> Namina bauanai fei faloloa'iaa Jesus. Si'ei, na roainaa panina, idoaa ununa ma ware, "Na rawani a'au. Ena unumu, i fafa'arai." <sup>42</sup> Ana ei ua, na pedu ei watawatana ma na fafa'arai ei ununa.

<sup>43</sup> Jesus na alofawanewaneinia ma warefawe'i a'ana, <sup>44</sup> "Ma'aia. Apuna warefanaa nemea ma'uaa onei dinaa a'a mena bauaniaa humuu mei Haidaa ma fanaa ena fanamu wagina ale'ei i warefanio Moses, ale'ei uni'unina a'a ro'ou ba ona fafa'araidii." <sup>45</sup> Agia, i nolao, fimina u'u'u ma fatalaina fei rawani'aa Jesus a'ana. Si'ei ba ina u'u'u, fai lo'e ba Jesus i wadu'aifalelefo a'a hepalo gufu ma na guta u'ugai ua fawelei lo'e

§ **1:40:** **1:40** Ware Greek ba hefi'a mau funuaa hudi unu—aba unaa watawata ua.

rama'a. Ma'uaa ei rama'aa ena tadiwe'aiaa gufu, ana roimina'u no'ualao a'ana.

## 2

### *Jesus na Fatalaina Mei i Ma'e Ununa*

*(Matthew 9:1-8; Luke 5:17-26)*

<sup>1</sup> Nenee hefi'adai arewaa, ei i hadiwe'idinaa Capernaum Jesus, ei rama'a, rona guainia ba Jesus na nodigimai gufu. <sup>2</sup> Watauda, rona papa'ifigupuimai ma pa'aa lomi na hawiaa ro'odu fei laloo humu; namina pepesu. Auguu fei gigei, ana ronamina fihoroi. Ma ifi warefanaa ro'odu fei rawani'a warea. <sup>3</sup> Hefi'a, rona dugamii hemea rama'a na ma'e ununa. Gunaroa rama'a, rona notabeiamai. <sup>4</sup> Si'ei ba ronamina fihoroi, lomi rona noporopa'alo mei rama'a a'a Jesus. Ro'adii, rona bigigiaa fei ha'oo fei humu, fawelei nana'aa Jesus. Mei rama'a i ma'e ununa, na haino pafuu fei hafenaa ununa ma rona fataularaiarai a'a Jesus. <sup>5</sup> I ma'aia Jesus ba napa'aa we'i naranaraa ro'odu, na warenaa a'a mei i ma'e ununa, "Mena na'uu, ena hafelo'amu, una futoia."

<sup>6</sup> Fei au fei, hefi'a ei feroiaa law, ana rona guta hugiaa ro'odu. Ronamina naranara watauda. <sup>7</sup> "Tani i ware ale'ei mei rama'a mei? Ina ware-fafeloaa mei Haidaa. Lomi hemea i futoaa ei hafelo'a. Ana unaa mei Haidaa."

<sup>8</sup> Ana ei ua, Jesus na aidadii ei naranaraa ro'odu. Ma ina warenaa a'a ro'odu, "Tani hamomina naranara ale'ei? <sup>9</sup> Afaia na maduta—fei una warenaa a'a mei i ma'e ununa ba, 'Ei hafelo'amu na futoia,' o fei una ware ba, 'Asi'aa, tonaa fei hafenaa unumu ma talai?' <sup>10</sup> Ma'uaa si'ei ba hamonei aida ba mei Na'uu Rama'a, na pa'i faufauna yeni

malagufu ba i futoaa ena hafelo'a . . ." Ina warenaa a'a mei i ma'e ununa, <sup>11</sup> "A ware a'amu, asi'aa, tonaa fei hafenaa unumu ma dinaa gufumu." <sup>12</sup> Na asi'aa, tonaa fei hafenaa ununa ma talai i pudaa ro'ou ma di'ininaa ro'odu. Namina nanawala pudaa minaa ei rama'a ma rona uduginaa mei Haidaa. Rona ware ba, "Lomi ona ona'u fanunupa'i he'a manumanu ale'eni feni!"

*Na Dugaa Levi  
(Matthew 9:9-13; Luke 5:27-32)*

<sup>13</sup> Jesus na aunudinaa piye. Hefaa baua gupuu rama'a, rona nomai a'ana ma ina feroinaa ro'odu. <sup>14</sup> Ei fi talailao, na fanunupa'aa Levi, mei na'uu Alphaeus na guta a'a fei palee ei otonaa mugoo po'ii gavaman. Jesus na warenaa a'ana, "Nenerau." Levi na asi'aa ma nenegia.

<sup>15</sup> Ifi hanana gufuu Levi Jesus, wataudadiai ei otonaa mugoo po'ii gavaman ma ei hafelo'a rama'a, rona hananafipui a'ana mawe ei otalai nenerana, uaa watauda na nenegia. <sup>16</sup> Ro'aa fanunuia ale'ei ei feroiaa law, ei ro'ou Pharisee, rona i'igainaa ei otalai nenerana ba, "Tani i hananafipui a'a ei otonaa mugoo po'ii gavaman ma ei rama'a hafelo?"

<sup>17</sup> I'a guainaa fei, Jesus na warefanaa ro'odu ale'ei, "Abaa ena rona rawani ena ronei pa'i hemea lo'otaa, uaa ena rona pa'i funua. Eni a norai, abaa ei re labaginaa ena wanewanea, uaa ena hafelo'a rama'a."

*Rona Haninaa Jesus a'a fei Fabaoa  
(Matthew 9:14-17; Luke 5:33-39)*

<sup>18</sup> Ei otalai neneraa John ma ei Pharisee, rona fabao. Hefi'a rama'a, rona nomai ma i'iginaa Jesus

ba, "Tani ipo'o biyei ba, ei otalai neneraa John ma ei otalai neneraa ei Pharisee, rona fabao ma'uaa ei otalai neneramu, lomi."

<sup>19</sup> Jesus na ware, "Nabaa hemea ba i lalai ma i bigi'aa hefaa hananaa, batanai ba ro'aa fabao ei i guta a'a ro'ou? <sup>20</sup> Ma'uaa iwe nomai fei au ba mei lalaia, lomi i guta a'a ro'ou, uaa hefi'adai, rowe dugia. Ma a'a fena arewaa fena, rowe fabao.

<sup>21</sup> "Lo'e hemea ba i tawi'aa ei maninii ena manufau lawalawa ma waro'aa ei wara'aa watanai lawalawa. Nabaa i bigi'ia ale'ei, fei manufau maninii lawalawa, i rapudigeaa fei watanai lawalawa ma imina forafawara'a'apoidinia. <sup>22</sup> Ana lomi hemea rama'a i igiaa ei manufau wine a'a ei watanai pe'ii wine. Nabaa i bigi'ia ale'ei, fei manufau wine i fawara'aa fei pe'ii wine ma fei wine ma fei pe'ina, lagu'amina fai hafelo. Si'ei ba fei manufau wine, ana ronei iginaa laloo ei manufau pe'ii wine."

*Mei Fasuu fei Sabbath  
(Matthew 12:1-8; Luke 6:1-5)*

<sup>23</sup> Jesus ma ei otalai nenerana, ro'ei tatalai dupuaa fei pe'ii corn hefaa Sabbath ma rona hufu'aa ei corn. <sup>24</sup> Rona warenaa a'a Jesus ei Pharisee, "Ma'aia, ei otalai neneramu, rona barafeaa fei law laloo fei Sabbath."

<sup>25</sup> Ina warefanaa ro'odu, "Haa, lomi hamona igoaa tamanu David na bigi'ia ei hia ma ei maroana ro'aa bao ma rona pa'i nunumiaa ro'ou?  
<sup>26</sup> A'a fei au Abiathar, mei pa'aa bauaniaa humuu mei Haidaa, David na wadu'ainaa fei humuu mei Haidaa ma na hanaiaa ei faraa pidaua, ei rona apunainaa a'a mei Haidaa ma lomi na rawani a'a

fei law ba nemeadai i tonia. Ma ana ina fanaa ei faraa pidaua a'a ei maroana.

<sup>27</sup> Ma na ware Jesus, “Fei Sabbath, bigi'aa mei Fasu ba fararawanii rama'a ma a'a ba rama'a manumanuu fei Sabbath. <sup>28</sup> Uaa, mei Na'uu Rama'a, hia Fasu, ana Fasuu fei Sabbath.”

### 3

#### *Mei Rama'a na Ma'e Hepapa Panina (Matthew 12:9-14; Luke 6:6-11)*

<sup>1</sup> Hefaranidaii Jesus na wadu'ainaa fei synagogue ma na pa'i hemea na ma'e hepapa panina. <sup>2</sup> Hefi'a ei ro'eifane lalabaginaa ei tataa Jesus, ro'ou yei. Ronamina pupudainaaii Jesus, ba i farawaninia laloo fei Sabbath, o? <sup>3</sup> Jesus na warenaa a'a mei rama'a, “Mi ufalarai i ma'aa ro'ou.”

<sup>4</sup> Ma na i'iginaa ei rama'a Jesus ba, “Fei law na ware ba tamanu na rawani a'a fei Sabbath? Fei ba o bigi'aa ei rawani'a, o ei hafelo'a? Ba o hadumaa rama'a, o fafeloaa rama'a?” Ma'uaa lomi rona'u ware.

<sup>5</sup> I fanunuua ei maumau ro'ou ale'ei Jesus, namina sibafafelo ma'uaa ana namina faloloa'inaa ro'odu, uatani, namina waiwai tabaa ro'odu ma ana ronamina tata. Si'ei na warenaa a'a mei rama'a, “Roainamai panimu.” Na roainaa panina mei rama'a ma fei panina na rawanidaii. <sup>6</sup> I dii, ei Pharisee, rona asi'aa a'a fei synagogue ma re gutafipui a'a ei maroaa Herod ma pagipagiaa hefi'a tala ba ro'aa fo'afama'eaa Jesus.

#### *Ei Gupuu Rama'a, Rona Neneraa Jesus*

<sup>7</sup> Jesus ma ei otalai nenerana, rona aununaa agi. Ma hefaa baua gupuu rama'a, noramiaa

ro'ou Galilee, rona talaineneraa Jesus. <sup>8</sup> Ro'aa guinaa minaa ei bigi'aa Jesus, rona nomai a'ana. Gufuu hefi'a, Judea, Jerusalem ma Idumea; ma gufuu hefi'a, yei pepei anaa halo i Jordan ma hefi'a, fawelei Tyre ma Sidon. Minaa eni rama'a eni, rona nomai a'a Jesus, uatani ronamina guinaa tamanu ina bigi'ia. <sup>9</sup> Ei rama'a, ronamina watauda. Si'ei ba namina rata fei gupuu rama'a, ina ware a'a ei otalai nenerana ba ronei rapu'augamiaa hepalo wa, ba ronei'aa puroroinia ei rama'a. <sup>10</sup> Uaa namina farawanidigaa watauda rama'a a'a ei funuaa ro'odu. Ei funua, ro'ei nigo talaa ro'odu ba ro'aa dinaa a'a Jesus ma idoia. <sup>11</sup> Ei rona'o fanunupa'aa Jesus ei spiriti hafelo,\* rona'o fapasinaa pu i ma'ana ma aiharoharo, "Yoi, mena Na'uu mei Haidaa." <sup>12</sup> Ma'uaa Jesus na warefawe'i a'a ei spiriti hafelo ba apuna warefanaa nemea ba hia hini.

*Fei Rafeiana ei Hefua ma Helagui Apostle  
(Matthew 10:1-4; Luke 6:12-16)*

<sup>13</sup> Jesus na dinaa papaa hepalo maugen ma harofaa ei nunumiana ma rona dinaa a'ana. <sup>14</sup> Ina rafeinaa hefua ma helagui—ma roroinaa ro'odu apostle† — ba ronei oafipui a'ana. Ma ba i aloaa ro'odu ba ronei wareaa fei rawani'a warea <sup>15</sup> ma ro'aa pa'i faufau ba ro'aa fa'asi'anaa ei pigaea. <sup>16</sup> Si'eni, eni rafeiaa Jesus: Simon (Jesus na roroinia Peter); <sup>17</sup> James ma mei lofuna John, laguei na'uu Zebedee (Jesus na roroinaa lagua Boanerges, hanuna ba laguei Na'uu Parara);

---

\* **3:11: 3:11** Ware Greek *spiriti lolooa*; v. 30 anaa      † **3:14: 3:14**  
Hefi'a ne'ia lomi na pa'i roroinaa ro'odu apostle.

**18** Andrew, Philip, Bartholomew, Matthew, Thomas, James mei na'uu Alphaeus, Thaddaeus, Simon mei Zealot (hanuna ba na haguua gufuna),  
**19** ma Judas Iscariot, mei i aloaa Jesus.

*Jesus ma Beelzebub*

(Matthew 12:22-32; Luke 11:14-23; 12:10)

**20** I dii, Jesus na wadu'ainaa hepalo humu ma wataudadiai, rona figupui yei. Si'ei Jesus ma ei otalai nenerana, lo'e rona hawia ba ro'aa hanana.  
**21** Ro'aa guainia ei maroana, rona aunu ba ro'aa dugia, uaa rona ware ba, “Ina poapoai tabana.”

**22** Ma ei feroiaa law, ei noramiaa ro'odu Jerusalem, rona ware ba, “Ina wadu'ia Beelzebub.‡ A'a fei faufau mei fasafui ei pigea, inafane fa'asi'anaa ei pigea.”

**23** Si'ei na harofaa ro'odu Jesus ma warehanunuinia ba, “Batanai Satan i fa'asi'anaa Satan? **24** Nabaa hepalo gufu i fifalagii, fei gufu fei, lo'e i ufalarai. **25** Nabaa hepalo humu i fifalagii, fei humu fei, lo'e i ufalarai. **26** Nabaa Satan na ofadugaa anaia ma hia i fifalagii, lomi i ufalarai ma fei auna na pedudii. **27** Pa'aa fa'ua, lomi hemea i wadu'inaa humuu hemea faufau rama'a ma topa'ainaa ei manumanuna. Ineido'o roro'inaa mei faufaua ma hinene iwe topa'ainaa ei manumanu humuna. **28** Apa'aa warefa'uai a'a hamu'odu ba minaa ena hafelo'a ma ei rona warefafeloaa mei Haidaa, hia, i futoia. **29** Ma'uaa hini i warefafeloaa fei Spiriti Apuna, fei hafelo'ana lomi i futo. Ina bigi'aa hefaa hafelo'a lomi i pedutoo.”

---

‡ **3:22:** 3:22 Greek Beezeboul o Beelzeboul

<sup>30</sup> Ina wareaa feni, uaa roimina wareware ba, “Ina taoia hefaa hafelo'a spiriti.”

*Mei Ina Mawe ei Lofuu Jesus  
(Matthew 12:46-50; Luke 8:19-21)*

<sup>31</sup> Si'ei rona nomai, mei inaa Jesus ma ei lofuna. Rona u yei ano ma aloaa hemea ba neiree dugamii Jesus. <sup>32</sup> Watauda ronamina guta hoaninaa Jesus ma warefania ba, “Mei inamu ma ei lofumu, ro'ou i ano ma roi lalabaginio.”

<sup>33</sup> Na i'igai Jesus ba, “Hini mei inau ma ei lofuu?”

<sup>34</sup> I dii, ina fanunuua ei rama'a, ei rona guta hoaninia ma na ware, “Si'eni, eni inau ma lofuu!

<sup>35</sup> Hini ena rona bigi'aa ei nunumiaa mei Haidaa, si'ena, ena lofuu, agiu ma inau.”

## 4

*Fei Warea Hanunuui mei Faroaa ei Lau  
(Matthew 13:1-9; Luke 8:4-8)*

<sup>1</sup> Jesus fi feroidinaa ei rama'a yei piye ma abaa po'o ma'ida ei rama'a. Si'ei, Jesus na hugi pafuu wa ma na guta pafona laloo agi. Ma ei rama'a, rona guta piye. <sup>2</sup> Jesus na warehanunuinaa watauda manumanu ei fi feroinaa ro'odu. <sup>3</sup> “Hamu'ou guai! Na pa'i hemea rama'a ba i sumai lau i pe'ihape. <sup>4</sup> Ma ei fi suminaa ei lau, hefi'a rona pasi papaa tala ma rona fidumai ei manufidufidu ma rafahanaia. <sup>5</sup> Ma hefi'a na pasi pafuu fawelei na pa'i na'ana'a ma lo'e namina pi'odua fei piye, si'ei ronamina habe maduare ei lau. <sup>6</sup> Ma i notautarerai fei halo, na babai ma na faholeaa ro'odu ma rona ma'e, uatani lo'e na pa'i waraa ro'odu. <sup>7</sup> Ma hefi'a lau, rona pasi dupuaa ei wowo'ii, ei rona hogia ma ei wowo'ii na fifigaa ro'odu ma si'ei, lomi

rona fuaa. <sup>8</sup> Ma hefi'adai lau na pasi fawelei na pa'i farawani piye ma ronamina habe mamaugi ma ronamina fuaa farawani. Hefi'a, fuaa ro'odu, odufua pa'ania; hefi'a, fuaa ro'odu oloroa pa'ania; ma hefi'a, hefa pu'u."

<sup>9</sup> Na warefanaa ro'odu Jesus, "Hini na pa'i adiana nei guainia."

*Tani i Warehanunui Jesus  
(Matthew 13:10-17; Luke 8:9, 10)*

<sup>10</sup> Ma ei do'o uniaa Jesus, ei Hefua ma Helagui mawe hefi'adai, rona i'igainaa Jesus hanuu fei warehanunuiana. <sup>11</sup> Jesus na warefanaa ro'odu, "Na unifanidigaa hamu'ou ei manumanu na ude'opa'ai a'a fei haparaiaa mei Haidaa. Ma minaa ei abaa maroaa o'odu, rona guai'uaia ale'ena warea hanunu. <sup>12</sup> Si'eい ba i ale'ei,  
"Ro fanunu ma fanunu ma'uua, lomi ro'aa fanunupa'i,

ma ro guguai ma'uua lo'e ro'aa apa'ia.

Ma nabaa rona aida, ro'aa filoginaa ei naranaraa ro'odu  
ma hadiwe'inaa a'a mei Haidaa ma mei Haidaa, i futoaa ei hafelo'aa ro'odu."

*Ina Piguaa Hanuu fei Warea Hanunuu mei Faroa  
(Matthew 13:18-23; Luke 8:11-15)*

<sup>13</sup> I dii, Jesus na warenaa a'a ro'odu, "Haa, lomi hamona aida fei warea hanunu? Batanai ba hamo'aa apa'aa hefi'adai warea hanunu? <sup>14</sup> Mei faroa nafafufugu'aa fei warea. <sup>15</sup> Hefi'a rama'a, ale'ena ei lau na pasi ma'aa tala, fawelei na faro fei warea. Ana ei ro'aa guainia na nomai Satan ma tosiminaa ei rawani'a warea laloo iaa

ro'odu. <sup>16</sup> Hefi'a ale'ena ei lau na pasi pafoo ei na'ana'a. Rona tonaa fei rawani'a warea ma ronamina ni'eni'e. <sup>17</sup> Ma'uaa si'ei ba lomi na gugu waraa ro'odu, lo'e na madii ma i bapa'aa ro'odu ei hafelo'a o ei haperararaia wagii fei wareaa mei Haidaa, rona rawa'a'afai batata. <sup>18</sup> Hefi'adai, ale'ena ei lau na pasi dupuaa ei wowo'ii, ei rona hogia. Rona guainaa fei warea, <sup>19</sup> ma'uaa ronamina naranara watauanaa fei gutanaa ro'odu ma naranara watauda ba ronei pa'i watauda manumanu ma nanamainaa watauda manumanu ma ei manumanu ei, na hawai'ona fei rawani'a warea ma lomi rona fuapa'i. <sup>20</sup> Ma'uaa hefi'a rama'a, ale'ena ei lau, ei ro'aa pasi pafoo fei rawani'a piye. Rona guainaa fei warea ma rona tonia. Rona habe ma fuua. Hefi'a, fuua ro'odu, odufua pa'ania; hefi'a, oloroa pa'ania; hefi'a, hefa pu'u—ei fuua ro'odu.”

*Fa'arewaiaa fei Rawani'a Warea  
(Luke 8:16-18)*

<sup>21</sup> Na warenaa a'a ro'odu Jesus, “Ei hamona'o tonaa fei we'ai, hamona augia haroo hepalo hagi, o haroo tawa? Lo'e, hamona'o augia pafoo tawa. <sup>22</sup> Ma'uaa, tamanu manumanu na opa'ai, hinene iwe udelelefo. Minaa ena manumanu rona aupa'ainia ena rama'a, iwe ude'arewa'ua. <sup>23</sup> Hini na pa'i adiana nei guania.”

<sup>24</sup> Na waredilao Jesus, “Narama'aiaa tamanu ei guaiaa hamu'odu. Hefiga ei fanamu, ana ale'ena ona tonia ma wataudadi. <sup>25</sup> Hini i pa'i manumanuna, iwe to hefi'adai. Ma mei lomi manumanuna, tamanu ma'idei na pa'i, mei Haidaa iwe tonia a'ana.”

*Fei Warea Hanunuu fei Habeaa fei Lau*

<sup>26</sup> Ma ana ina ware, “Ale'eni maumau fei hapaiaa mei Haidaa. Hemea rama'a fi sumaitalaneneneinaa ei lau i pe'ihapena. <sup>27</sup> Minaa ei poi ma arewaa, na'aa ina ma'igu o lo'e, ei lau, rona nusu ma habe ana ro'ou; ma mei rama'a mei, lomi na aida batanai ro'ei nusu. <sup>28</sup> Fei piye ua, fei i fahabeia—rawarawa fei pa'apa'a na sunai; nene, fei obana; ma laloo fei oba, ei launa. <sup>29</sup> Ma i we'idii ei fuana, mei rama'a na balainia ma hufu'aa ei fuana, uaa napa'aa fei au hufu'a.”

*Fei Warea Hanunuu fei Lau Mustard*

(Matthew 13:31, 32, 34; Luke 13:18, 19)

<sup>30</sup> Jesus na warediai, “O ware ba tawi'aa fei haparaiaa mei Haidaa ale'ei tamanu? O hanunuinia a'a tamanu? <sup>31</sup> Tawi'ana ale'ena fei lau mustard, fei na pa'aa pusu'oroi laraa ei lau yeni malagufu. <sup>32</sup> Ma'uaa, ei ro'aa faroia, na habe bauanai. Namina bauanaidi'ininaa minaa ei haihai laloo pe'ihape. Ei rarana namina bauanai. Si'ei, ei manufidufidu na'aida guta a'a fei giogiona.”

<sup>33</sup> Watauda ei mau warea hanunu Jesus nafane hawawagifanaa ei rama'a, ei na hawia ba ro'aa apa'ia. <sup>34</sup> Ma lo'e ina wareaa hepalo manumanu a'a ro'odu ba lo'e na hanunuinia. Ei unaa ro'ou ei otalai nenerana, Jesus na ware'italalafuinaa minaa ei manumanu.

*Jesus na Famadinoaa fei Lama*

(Matthew 8:23-27; Luke 8:22-25)

<sup>35</sup> Fei arewaa fei, inofafilao, na ware a'a ei otalai nenerana ba, “O dii, o dinaa pepei.” <sup>36</sup> Rona di'ininaa ei watauda rama'a ma fatalenodugaa Jesus pafuu fei wa, fei na hugidii pafona ma aunu.

Ma ana na pa'i hefi'adai wa rona aunufipui a'ana.  
<sup>37</sup> Ma ina una'aa fei baua lalarena ma fei agi na fuama'i'i ma na rata fei lama ma na fuama'i'inaa laloo fei wa ma anaa i lolo. <sup>38</sup> Jesus na ma'igu i mugi pafoo hepalo duduna. Ma rona funifunia ei otalai nenerana. “Feroia, lomi ona narapa'aa o'odu ba o'aa wawau'u?”

<sup>39</sup> Na asi'aa ma warenaa a'a fei lalarena ma fei lama ba “O famadumu.” Fei lalarena na rere ma fei lama namina madino.

<sup>40</sup> Si'ei na warenaa a'a ei otalai nenerana ba, “Tani hamo'amina ma'au ale'ei? Haa, atapo'o we'i naranaraa hamu'odu?”

<sup>41</sup> Ronamina ma'au ma fi'i'igai ba, “Rama'a bata meni ba fei lalarena ma fei lama, ana na guaipa'aa wareana?”

## 5

### *Fei Farawaniana mei Rama'a na Wadu'ia Pigea (Matthew 8:28-34; Luke 8:26-39)*

<sup>1</sup> Rona fatete pepei a'a fei gufu Gadara.\* <sup>2</sup> Ma i'a upudi'ininaa fei wa Jesus, na dinamii a'ana hemea rama'a na wadu'ia hefaa spiriti hafelo,† noranamai a'a ei huapu. <sup>3</sup> Ma inafane guta i a'a ei huapu. Lomi na hawia ba hemea i roro'ipa'ia. Ana lomi na hawia ei alatai pidaua. <sup>4</sup> Ronamina bobo'inaa pinena ma panina wataua au ma'uaa namina ba'amoro'aa ei alatai pidaua ma ei wao. Pa'aa lomi hemea rama'a ba i panarofitanipa'ia. <sup>5</sup> Poi ma arewaa, i dupuaa

---

\* **5:1:** 5:1 Hefi'a ne'ia *Gadarenes*; hefi'adai *Gergesenes*      † **5:2:**  
**5:2** Greek *spiriti lolooa*; vv. 8 ma 13 anaa

ei huapu ma ei maugen, imina aiharoharo ma hawihawi'aa ununa a'a ei mugoo.

<sup>6</sup> I fanunupa'aa Jesus rauaa, na ponifa'unaa du'una i ma'ana. <sup>7</sup> Namina aiharoharopararai ba, "Tamanu ei nunumiamu a'au, Jesus, mena Na'uu mei Haidaa, mei napa'aa Pafeai? A'a fei haraa mei Haidaa oneipa'aa warefa'uai ba lomi o fagianaina!" <sup>8</sup> Uatani, Jesus na waredii a'ana ba, "Wala'amai a'a mena rama'a mena, yoi, fena spiriti hafelo!"

<sup>9</sup> Si'ei, na i'iginia Jesus ba, "Hini haramu?"

Na ware ba, "Harau, Watauda, uaa hai'odu watauda." <sup>10</sup> Ma na i'igai watauda a'a Jesus ba apuna alofatatalaina ro'odu fawelei.

<sup>11</sup> Abaa po'o ma'ida moimoi ro'ei hanana papaa fei maugen. <sup>12</sup> Ma ei spiriti hafelo, rona i'iginiaa Jesus, "Onei alonaa hai'odu dupuaa ei moimoi; uga ba hai'ou wadu'aa ro'ou." <sup>13</sup> Si'ei, Jesus na ugaina ei hafelo'a spiriti ma rona asi'adi'ininaa mei rama'a ma wadu'inaa ei moimoi. Puduu ei moimoi, ale'ena heguae pufaba'a. Rona poni'u'upu papaa fei maugen, pepe'i imina faro'ai ma pasinää laloo fei ranu ma wawau'uma'e.

<sup>14</sup> Ei oma'ama'aa ei moimoi, rona ponibagua ma warefanaa ei rama'aa gufu ma ei gufu sugatata'aia ma ei rama'a, rona aunu ba ro'aa ma'a. <sup>15</sup> Ro'aa nomai a'a Jesus, rona fanunupa'aa mei na wadu'ia watauda pigea na guta lalawai ma namina rawanidiae; ma ronamina ma'au. <sup>16</sup> Ei rona fanunuia, rona u'ufanaa ei rama'a tamanu bigi'aa Jesus a'a mei i wadu'ia pigea ma ana rona u'ufanaa ro'odu tamanu na pa'aa ei moimoi.

**17** Si'ei, ei rama'a rona i'igaifawe'i a'a Jesus ba inei di'ininaa fei gufuu ro'odu.

**18** Ma ei ba i hugi pafuu fei wa Jesus, mei rama'a, mei ro'aa wadu'ia ei pigea, na i'iginaa Jesus ba ana i aunuhugia. **19** Lomi na ugania Jesus, ma'uaa na ware ba, "Baguanaa gufu ma ware-fanaa ena gufumu ena bigi'aa mei Fasu a'amu ma fei faloloa'iana yoi." **20** Si'ei, mei rama'a mei, na aunu ma u'u yei Decapolis<sup>†</sup> tamanu na bigi'ia a'ana Jesus. Ma minaa ei rama'a, rona ba'arofo.

*Mei Nanaao Ma'ea ma mei Pifine na Funu  
(Matthew 9:18-26; Luke 8:40-56)*

**21** I hugidai pafuu wa Jesus ma fatetediai pepei, abaa po'o ma'ida ei rona hoaninia piye. **22** Hemea ei bauaniaa fei synagogue, harana Jairus na nomai yei, fanunupa'aa Jesus ma fapasi o'igoana. **23** Ina i'igifininaa minaa ei naranarana a'a Jesus ba, "Mei na'uu, baduu pifine, anaa i ma'e. Oneipo'o nomai ma augaa fei panimu pafona ba nei pedu fei funuana ma i gutadiai." **24** Si'ei, na aunuhugia Jesus.

Abaa po'o rama'a, ei ro'aa nenegia ma puro-roinia. **25** Ma hemea pifine yei nafane'o wigiwiji namona, ale'ena hefua ma heguae igisimasi. **26** Watauda lo'otaa, rona roinia ma'uaa, ei fi'ina na ude'ualao. Namina pedu ei mugoo po'ina, ma'uaa fei funuana lomi na u pedu. Namina apoi ua. **27** I guainaa ei u'ugaa Jesus a'a hefi'a, na talaimai nenee Jesus dupuaa ei watauda rama'a ma na idoaa fei hawaa uguu Jesus. **28** Uatani na nara

---

<sup>†</sup> **5:20:** **5:20** Hanuna fei warea Greek ba *Hefua Gufu*

ale'ei ba, "Nabaa a ido'uaiaa fei hawaa uguna, awe rawani." <sup>29</sup> Ana ei ua, lomi na fai wigwigidiae fei namona ma na nanamuinia ba nawe pedu fi'ina.

<sup>30</sup> Ana ei ma na nanamuinia Jesus ba ma'ida faufauna na di'ininia ma na momo'ai dupuaa ei rama'a ma i'igai ba, "Hini na idoaa fei hawaa uguu?"

<sup>31</sup> Rona ware ei otalai nenerana, "Ona fanunuia eni watauda rama'a, rona puroroinio. Batanai ei o i'igai ba, 'Hini na idoau?'"

<sup>32</sup> Ma'uaa Jesus fima fanunula-barainia ba hini na bigi'aa fei. <sup>33</sup> Si'ei, mei pifine na aida ba na hoto fei namo, na nomai ma fapasi i fasuu hunana ma namina ma'afunurere ma warefa'uai a'ana. <sup>34</sup> Ina warenaa a'ana ba, "Mena na'uu, fei we'iaa naranaramu na farawaninio. Aunufarawani ua. Ona ala a'a fena fi'iamu."

<sup>35</sup> Ana fi wareware ua Jesus, hefi'a noramiaa ro'ou humuu Jairus, mei famamoaa fei synagogue, rona warenaa a'a Jairus ba, "Mei na'umu baduu pifine na ma'edii. Tani o fa'udeguguaa unuu mei feroia?"

<sup>36</sup> Na guai'au'uaialao ei wareaa ro'odu Jesus ma na ware a'a mei famamoaa fei synagogue, "Apuna ma'au; onei narafawe'i ua."

<sup>37</sup> Lomi na ugainaahemea ba i nenegia; uniaa Peter ma laguei filofui, James ma John. <sup>38</sup> Ma ei ro'aa nosufudailao humuu Jairus, mei bauaniaa fei synagogue, Jesus na guaipa'aa ei rama'a, ronamina waigi ma aimemewai. <sup>39</sup> Na wadu'ai ma i'gainaa ro'odu ba, "Tani hamomina waigi ma aimemewai? Mei baduu, lomi na ma'e. Na ma'igu ua." <sup>40</sup> Ma'uaa rona fadinia.

I fa'asi'adigaa ei rama'a, na dugaa mei ama ma inaa mei baduu ma ei otalai nenerana, ei ro'ou a'ana ma rona wadu'ainaa laloo humu a'a mei baduu. <sup>41</sup> Na tauaa panina ma na warenaa a'ana, “Talitha koum!” (hanuna ba, “Mena baduu pifine, a warenaa a'amu, asi'aa!”). <sup>42</sup> Ana ei ua, mei baduu na ufalarai ma tatalai (igisimasina, hefua ma heguai). A'a fei, ronamina ba'arofo. <sup>43</sup> Ina warefawe'i a'a ro'odu ba ronei'aa warewareaa feni a'a nemea ma ronei fani hanaa mei baduu.

## 6

### *Mei Mamama'a Lomi Ro'aa Ma'auia (Matthew 13:53-58; Luke 4:16-30)*

<sup>1</sup> Jesus na di'ininaa yei ma hadiwe'inaa gufuna, ro'ou ei otalai nenerana. <sup>2</sup> I nopa'alo fei Sabbath, na una'aa ma feroinaa ei rama'a laloo fei synagogue. Ma watauda ei rona guainia, namina nanawala pudaa ro'ou.

Ma rona i'igai “Po'o tonana hitani eni manumanu eni, meni rama'a meni? Tamanu fei apa'a, ina tonia ba ana imina bigi'aa ei foigia! <sup>3</sup> Haa hemeni, fadufadua ua! Ana meni na'uu Mary ua, mei lofuu James, Joseph, \* Judas ma Simon! Ma eni agina ana a'a o'odu yenil!” Ma namina mamanunu unuu ro'odu a'ana.

<sup>4</sup> Jesus na warenaa a'a ro'odu, “Ana a'a fei gufu'uana, dupuaa ei gufuna ma laloo fei humuna, hemea mamama'a, lomi ro'aa ma'auia.” <sup>5</sup> Lo'e na hawia ba i bigi'aa ne'aa foigia yei ma'uaa na augaa panina pafuu hefi'a ei funua ma

---

\* **6:3:** 6:3 Ware Greek Joses, ana fei hara Joseph

farawaninaa ro'odu. <sup>6</sup> Ma na ba'arofo a'a ro'odu ba lo'e na we'i naranaraa ro'odu.

*Jesus na Aloaa ei Hefua ma Helagui  
(Matthew 10:5-15; Luke 9:1-6)*

Jesus na tatalai ma feroinaa ei rama'a a'a hepalo gufu. <sup>7</sup> Na haronaa a'ana ei Hefua ma Helagui ma alofahelalaguinaa ro'odu ma fani forafora a'a ro'ou ba ronei muainaa ei spiriti hafelo.†

<sup>8</sup> Si'eni, eni wareana: “Apuna notonaa hefi'a manumanu a'a fena tatalaiaa hamu'odu —lomi du'ua, raba o mugoo po'i laloo ena adii hamu'ou —ma'uaa, heina o ua. <sup>9</sup> Hamonei rafe supinai, ma'uaa lomi pafuaa susu. <sup>10</sup> Ma ena hamona wadu'ainaa hepalo humu, hamonei guta yena, nopa'awii fena ba hamo'aa di'ininaa fena gufu fena. <sup>11</sup> Ma na'aa hefi'a gufu, lo'e ro'aa fagutanaa hamu'ou o guaipa'aa wareaa hamu'ou, foifoiaa piyee pinee hamu'ou, ale'ena fama'ama'aa ro'ou ba rona tata.”

<sup>12</sup> Rona aunu ma u'ufanaa ei rama'a ba ronei filoginaa naranaraa ro'odu. <sup>13</sup> Rona fawala'anaa watauda pigea, igi pao pafuu watauda ei rona funu ma farawaninaa ro'odu.

*Na Waoro Huaa John, mei Pudugufaia  
(Matthew 14:1-12; Luke 9:7-9)*

<sup>14</sup> Mei Hapara Herod na guainaa fei, uaa fei haraa Jesus, nawemina bauanai. Hefi'a, rona ware† ba, “John, mei Pudugufaia na ma'elele'aa ma si'ei na pa'i faufauna ba i bigi'aa ei foigia.”

<sup>15</sup> Hefi'a, rona ware ba, “Hia Elijah.”

---

† **6:7:** **6:7** Ware Greek *spiriti lolooa*    † **6:14:** **6:14** Hefi'a ne'ia mina ba *Ifi warelaeo*

Ma hefi'adai, rona ware ba, “Hia hemea mama'a, ale'ei hemea mina mina.”

<sup>16</sup> Ma'uaa mei Hapara Herod, i guainaa fei, na ware “John, mei una moro'aa huana, na ma'elele'aa!”

<sup>17</sup> Uaa Herod na ware ba ronei panarofaa John ma roro'inia ma aunaa hia bobo'aia. Ina bigi'aa fei, uaa mei haroo mei lofuna Philip, harana Herodias, na lalainia. <sup>18</sup> Hamatee John nafane wareware a'a Herod ba, “Lomi na wanewane ba o tonaa mei haroo mei lofumu.” <sup>19</sup> Si'ei, namina bidi unuu Herodias a'a John ma ba i fo'afama'eia, ma'uaa lomi na hawia, <sup>20</sup> uatani Herod na ma'auaa John ma na'o lawagia, uaa ina aida ba John napa'aa wanewane ma na apunai. Herod, ei ina'aida guta a'a John ma guainaa ei u'ugana, namina hamamagua,§ ma'uaa na pa'i nunumiana ba i guainaa ei u'ugana.

<sup>21</sup> Inawe pa'aa fei rawani'a au. A'a fei arewaa waniniana, Herod na bigi'aa fei baua hananaa a'a ei bauaniaa gufu, ei bauaniaa ei fo'aa mawe ei bauaniaa Galilee. <sup>22</sup> I wadu'aimai mei baduu pifine na'uu Herodias, na ufa'ufa. Namina fani'en'i'ea Herod mawe ei ro guta hananafipui a'ana.

Mei hapara na warenaa a'a mei baduu pifine: “Tiginau tamanu nunumiamu ma a fanio.” <sup>23</sup> Ma ina fa'unai a'a mei baduu pifine ba “Tamanu o i'iginia, a pa'aa fanio nopa'awii hesuwi feni hapaiau.”

---

§ **6:20:** 6:20 Hefi'a ne'ia mina ba ei u'ugana, ina bigi'aa watauda manumanu

<sup>24</sup> Ina asi'aa ma warenaa a'a mei inana, "Yau a i'iginaa tamanu?"

Na ware mei inana, "Fena tabaa John, mei Pudugufaia."

<sup>25</sup> Ana ei, mei baduu pifine na wadu'aifanaa fei i'igaia a'a Herod: "Na nunuminio ba onei fanau e'eni ua fena tabaa John, mei Pudugufaia pafoo hepalo tabetabe."

<sup>26</sup> Mei hapara, namina bauana fei faloloa'iana, ma'uaa si'ei ba inapo'o fa'unaidii ma lomi na nunuminia ba i mamaafa pudaa ei roifi guta hanana a'ana, lomi ba i filoginaa wareana a'a mei baduu pifine. <sup>27</sup> Si'ei, na alomaduareinaa hemea moro'aa hua ba neiree morotonamii fei tabaa John. Na aunu mei, dinaa humuu bobo'aia ma lafigifamosuaa fei huua John <sup>28</sup> ma na notabeamai fei tabana pafoo fei tabetabe. Ina fanaa mei baduu pifine ma hia, na fanaa mei inana. <sup>29</sup> Ro'aa guainia ei otalai neneraa John, rona nomai, tonaa fei hudi ununa ma augia laloo huapu.

### *Jesus na Faguua Haipani Pufaba'a*

(Matthew 14:13-21; Luke 9:10-17; John 6:1-14)

<sup>30</sup> Ei apostle, rona figupuimai a'a Jesus ma warefania minaa ei bigi'a ma feroiaa ro'odu. <sup>31</sup> Si'ei ba abaa po'o ma'ida ei ro'e'i'u nomai ma nolao, pa'aa lomi na pa'i au ro'odu ba ro'aa hanana. Na warenaa a'a ro'odu Jesus ba, "Uniaa hamu'odu, hamonei nomai a'au ma o dinaa hefawala lomi wawaigia ba hamo'aa gutafawenai."

<sup>32</sup> Si'ei, rona aunu uniaa ro'odu pafoo wa ma aununaa fawelei lomi rama'a. <sup>33</sup> Ma'uaa wataudaa, rona fanunu'apa'aa ro'odu ma ei

rama'a gufu pedu, rona poni'uanaa pinee ro'odu. Ronare'o susufudai ma nene, Jesus ma ei otalai nenerana. <sup>34</sup> I fatete Jesus, na fanunuia ba abaa po'o rama'a rona oma'adii. Namina faloloa'inaa ro'odu, uatani ro'ou ale'ei ei sipsipi lo'e oma'ama'aa ro'odu. Si'ei, na feroinaa ro'odu watauda manumanu.

<sup>35</sup> Ma eni, anaa i lolo fei halo. Si'ei, rona dinaa a'ana ei otalai nenerana ma ware ba "Namina raua faweleni ma namina fafidii. <sup>36</sup> Aloaa eni rama'a ba ronei aunulalabarai hanaa ro'ou a'a hefi'a ena gufu ma pono hanaa ro'odu."

<sup>37</sup> Ma'uaa ina ware, "Hamonei fani hanaa ro'odu."

Rona warenaa a'ana, "Nabaa ale'ei, i tonaa pono'aa hemea bigi'a ale'ena fainaroa puda!\* Pa'aa wareamu ba hai'ou'aa suminaa mugoo po'i ale'ei ma pono faraa pidaua ma fani hanaa ro'ou?"

<sup>38</sup> Ina i'igai, "Hefiga faraa pidaua hamona pa'i? Wi ma'a."

Ro'aa apa'idigia, rona ware ba, "Haipani faraa pidaua ma guapalo nia."

<sup>39</sup> Si'ei, Jesus na warenaa a'a ro'ou ba ronei fagutanaa ei rama'a ma figupuinaa ro'ou pafuu ei guana mamarawii. <sup>40</sup> Si'ei, rona guta. Hefi'a gupu, hefa pu'u ma hefi'a gupu, haipani pa'anua. <sup>41</sup> Na tonaa haipaniei faraa pidaua ma guapaloei nia, aranaa pafea, ware 'ta', digedigeaa ei faraa pidaua ma fanaa ei otalai nenerana ba ronei fanaa ei rama'a. Ana na alaginaa guapaloei nia a'a minaa ei rama'a. <sup>42</sup> Minaa ro'ou, rona hananamagu <sup>43</sup> ma ei otalai nenerana, rona tonaa hefua ma guapalo

---

\* **6:37: 6:37** Greek *i tonaa enu pu'u denarius*

pa. Ma ei pa, ronamina pepesu a'a ei masii faraa pidaua ma nia. <sup>44</sup> Puduu ei wawane rona hanana, haipani pufaba'a.

*Jesus na Talai Pafoo Agi  
(Matthew 14:22-33; John 6:15-21)*

<sup>45</sup> Ana ei, Jesus na ware a'a ei otalai nenerana ba ronei hugi a'a fei wa ma ronei'o a'aunudinaa Bethsaida. Ma hia, fido'odii aloaa fei gupuu rama'a. <sup>46</sup> I di'inidigaa ro'ou, na aununaa papaa hepalo maugen'i ba i lafulafu.

<sup>47</sup> I nofafilao, fei wa na pa'idigaa memewaa fei agi ma unaiana piye. <sup>48</sup> Na fanunuua ei otalai nenerana ro'eimina poreifawe'i, uaa fei lalarena na agisuafaa ro'odu. Ale'ena watolaa oduai ma oloroa ido'o mafufuo, Jesus nawe aununaa a'a ro'odu. Na tatalai ua pafoo agi ba i falogiaa ro'ou. <sup>49</sup> Ma'uaa, ei ro'aa fanunupa'ia fi tatalai pafoo agi, ronamina aimemewai, uaa ei naraa ro'odu ba hia, hani'u. <sup>50</sup> Si'ei ba minaa ro'ou pedu na fanunupa'ia ronamina ma'au.

Ana ei ua, ina warenaa a'a ro'odu ba, "Gutafarawani ua! Yau meni. Apuna ma'au." <sup>51</sup> Ma na hugilao a'a ro'ou pafoo wa ma fei lalarena na rere. Ronamina ba'arofo, <sup>52</sup> uaa lomi rona'u apa'ima'aiaa ei bigi'aa Jesus a'a fei faraa pidaua; namina waiwai tabaa ro'odu.

*Jesus na Farawaninaa ei Funua i Gennesaret  
(Matthew 14:34-36)*

<sup>53</sup> Ro'aa sualao, rona fatete yei Gennesaret ma pe'i yei. <sup>54</sup> Ana ei ro'aa rofo'upu pafoo fei wa, ei rama'a, rona fanunu'apa'aa Jesus. <sup>55</sup> Ei rama'a

ei, ronamina poni ua yei tadiwe'aia ma nopo-ro-poro'aa ei funua pafuu ei hafenaa unuu ro'ou aununaa hitani rona guainia ba Jesus yei. <sup>56</sup> Ma nabaa i aununaa hitani—a'a ei pusu'o gufu, baua gufu, o sugatata'aia, rona fahainopaa ei funua papaa ei humuu alo'alo. Ma ronamina i'igifawe'i a'ana ba nei ugaina ro'odu ba ro'aa idoaa fei supuu susuna. Ma minaa ei rona idoia, na pedu ei funuaa ro'odu.

## 7

### *Ei Feroia Noranamai a'a ei Upu Mina (Matthew 15:1-9)*

<sup>1</sup> Ei Pharisee mawe hefi'a feroiaa law, ei noramiaa ro'odu Jerusalem, rona figupui a'a Jesus ma <sup>2</sup> fanunupa'aa hefi'a ei otalai nenerana, ro'e'i hanana ma na loloa panii ro'odu. Lomi ronado'o huwe panii ro'odu. <sup>3</sup> (Ei Pharisee ma minaa ei Jew, lomi ro'aa hanana na'aa lomi ronado'o huwe panii ro'odu ale'e'i maumau ei upuu ro'odu. <sup>4</sup> Ma ena rona hadiwe'imai a'a ena humuu alo'alo, lomi ro'aa hanana nabaa rotawe huwe. Ronamina neneraa watauda maumau ei upuu ro'odu. Ale'ena fesuaa ena bara, ena pe'i ranu ma ena babagii.)\*

<sup>5</sup> Si'ei, ei Pharisee ma ei feroiaa law, rona i'igaina Jesus ba, "Tani ei otalai neneramu, lomi rona neneraa maumau ei upuu o'odu ma rona hanafininaa lolo panii ro'odu?"

---

\* **7:4: 7:4** Hefi'a ne'ia mina ba *pe'i ranu, pe'i ranu babai ma tawaa hananaa*

**6** Ina ware ba, “Naminapa'aa balawia ei wareaa mamama'a Isaiah ei idii wareaa hamu'ou ena ware'oni, ale'ei fei ne'ia ba:

“ ‘Eni rama'a eni, pa'aa ware ua umuu ro'odu ba rona ma'auau,  
ma'uaa ei naranaraa ro'odu namina raua a'au.

**7** Lomi hanuu losuiaa ro'ou yau;  
ena mau feroiaa ro'odu, rona feroinaa ena law ena pagipagiaa rama'a.’

**8** Hamonadii rawa'a'afinaa ei wareaa mei Haidaa ma panaro'uaiaa maumau ei upuu hamu'odu.”

**9** Ma na warenaa a'a ro'ou: “Rafee hamu'ou autadidiae ei wareaa mei Haidaa ba hamo'aa nen-eraa† maumau ei upuu hamu'odu! **10** Moses na ware ba, ‘Ma'auaa amamu ma inamu,’ ma ‘Hini i warefafeloaa amana o inana, ronei fo'afama'eia.’‡

**11** Ma'uaa hamona ware ba nabaa hemea na warenaa a'a mei amana o inana: ‘Tamanu ei manumanu ba o tonia a'au, Corban’, (hanuna ba lomi i fani a'a amana ma inana, uaa manumanuu mei Haidaa) **12** ma hamona apunainia ba inei'aa fai bigi'aa ne'a manumanuu amana o inana. **13** Si'ei, hamona suminaa ei wareaa mei Haidaa a'a ena maumau ena upuu hamu'ou, ena hamonamina'o totonamai. Hamonamina bigi'aa watauda manumanu ale'ena.”

*Ei Manumanu i Faloloaa Rama'a  
(Matthew 15:10-20)*

**14** Jesus na harodinaa a'ana fei gupuu rama'a ma ware, “Guaina minaa hamu'odu. Hamonei apa'aa feni. **15** Lomi hepalo manumanu i aunaan

---

† **7:9: 7:9** Hefi'a ne'ia ba fa'asi'anaa   ‡ **7:10: 7:10** Leviticus 20:9

poana hemea ba i faloloaia ma'uaa, fei i norai laloo iana i 'faloloaia.' ”§

<sup>17</sup> I di'inidigaa fei gupuu rama'a ma i wadu'ainaa fei humu, rona i'iginia ei otalai nenerana fei warea hanunu. <sup>18</sup> Na i'igai, “Haa, namina loto adiaa hamu'ou? Lomi hamona aida ba na'aa hepalo manumanu na wadu'ainaa laloo hemea, noranalao augu, lomi i faloloaia? <sup>19</sup> Uaa lomi na dinaa laloo fei naranarana ma'uaa, na dinaa laloo fei pahanana ma hinene, na lele'aa.” (Ei i wareaa fei, Jesus na ufugia ba minaa ei du'ua, na rawani.)

<sup>20</sup> Ma ina warelao ba, “Ena na lele'amai laloo iaa hemea, si'ena, ena na faloloaia, <sup>21</sup> uaa, i lalona, na lele'amai ena hafelo'a naranara, ena fitatafipa'aia, fafanaoa, fo'afama'e, fiharoharoipa'aia, <sup>22</sup> wawa'ai poa, fafeloa rama'a, sifisifi'a, unara'uaiaa ei hafelo'a, nanamaia, ena sifisifi warea ba i fafeloa nemea, mamagugua ma ena bigi'aa a'afoloia. <sup>23</sup> Minaa eni hafelo'a eni, noranamai laloo iaa hemea ma na faloloaia.”

*Fei Narafawe'iaa mei Pifinee Syrophoenicia  
(Matthew 15:21-28)*

<sup>24</sup> Jesus na di'ininaa fei gufu fei ma aununaa fawelei na rafi'inaa Tyre.\* Na wadu'ainaa hepalo humu. Lomi na nunuminia ba nemea i aida ma'uaa, pa'aa lomi na opa'aipa'ia ba hia yei. <sup>25</sup> Ina pa'i hemea pifine yei ma mei pifine mei, na pa'i na'una, pusu'o baduu pifine, mei na wadu'ia hefaa

---

§ **7:15:** **7:15-16** 'faloloaia.' **16** Hini na pa'i adiana ba i guai, inei guai. \* **7:24:** **7:24** Watauda ne'ia mina ba Tyre ma Sidon

spiriti hafelo.<sup>†</sup> Mei pifine mei, ana ei i guainia ba Jesus yei, ina nomai ma fapasi fasuu hunaa Jesus. <sup>26</sup> Mei pifine, hia Greece. Waniniana Syrian Phoenicia. Namina i'igifawe'i a'a Jesus ba neipo'o fawala'anaa fei pigea a'a mei na'una.

<sup>27</sup> Na warefania, “Ei pa'aa baduu (ale'ei, ei na'uu Israel), roneido'omina hanaiaa ei rona nunuminia, uaa lomi na wanewane ba o'aa tonaa ei hanaa ei pa'aa baduu ma fanaa ei hapee ro'odu ponoto.”

<sup>28</sup> Ina ware ba, “Pa'aa fa'ua, mena Fasu ma'uaa ei ponoto haroo tawa, rona hanaiaa ei masii du'ua, ei lomi rona hanaia ei baduu.”

<sup>29</sup> Ma ina warenaa a'ana ba, “Hamatee ona ware ale'ena, te, onei nowau. Fena pigea na di'inidigaa mena na'umu.”

<sup>30</sup> Ina aununaa gufuna ma fanunupa'aa mei na'una na haino pafuu tawa ma fei pigea na di'inidigaa.

### *Na Pedu Lotoaa Adia ma na Ba'atawara Umuu mei Rama'a*

<sup>31</sup> Jesus na di'ininaa malalaa Tyre, aunu'ailao Sidon, upu'ailao a'a fei Agii Galilee ma aununaa fawelei Decapolis.<sup>‡</sup> <sup>32</sup> Yei, hefi'a rona duginamii a'a Jesus hemea na loto adiana ma pa'aa lomi na warewarepa'i. Ma ronamina warefawe'i a'ana ba ineipo'o augaa fei panina pafuu mei.

<sup>33</sup> Nenee fei, ina dugi'u'uginia ma laguna raua a'a fei gupuu rama'a, Jesus na augaa ei ana'anana laloo adiaa mei rama'a. Ma ina huwi ma idoaa fei rawerawee mei rama'a. <sup>34</sup> Na aranaa pafea,

---

<sup>†</sup> **7:25:** 7:25 Ware Greek *spiriti lolooa*    <sup>‡</sup> **7:31:** 7:31 Hanuna fei warea Greek ba *Hefua Gufu*

fawenaifatemu ma warenaa a'ana, “Ephphatha!” (hanuna ba “Ma'awawa”).<sup>35</sup> A'a fei, guapaloei adiana nawe ma'awawa ma fei rawerawena nawe tatawei ma warewarepa'i.

<sup>36</sup> Jesus na warefawee'i a'a ro'odu ba ronei'awe warefanaa nemea, ma'uaa ena na'aida ware ale'ei, ana ro'eimina'u fiwarei'uaia.<sup>37</sup> Ei rama'a, ronamina ba'arofo. Rona ware, “Namina bigifarawaninaa minaa ei manumanu. Ana na farawaninaa ei lotoo adia ma ei lomi rona warewarepa'i.”

## 8

### *Jesus na Faguua Gunaroa Pufaba'a (Matthew 15:32-39)*

<sup>1</sup> A'a ei arewaa ei, hepalodiae baua gupuu rama'a, rona figupui. Si'ei ba pa'aa lomi hanaa ro'ou, Jesus na haronaa a'a ei otalai nenerana ma ware,<sup>2</sup> “Na pa'i faloloa'iau a'a eni rama'a rona oafipuidii a'au oduai arewaa ma lomi du'ua ba ro'aa hanana.<sup>3</sup> Nabaa a alonaa ro'odu gufuu ro'ou ma ro'aa notonaa baoaa ro'odu, ro'aa nomaralele-lao tala, uaa gufuu hefi'a ro'odu, rauaa.”

<sup>4</sup> Rona ware ei otalai nenerana, “Feni rauaa gufu ale'eni, i to hitani faraa pidaua hemea ba i faguua ro'odu?”

<sup>5</sup> Na i'igai Jesus, “Hamona pa'i hefiga faraa pidaua?”

Rona ware, “Olorompalo.”

<sup>6</sup> Ina ware a'a ei rama'a ba ronei guta pafuu malagufu. I todigaa ei olorompalo faraa pidaua ma waredii ba 'ta', na bidigedigeia ma fanaa ei otalai nenerana ba ronei augia i ma'aa

ei rama'a ma rona bigi'ia ale'ei. <sup>7</sup> Ana rona pa'i ma'ida pusu'o nia; ma ana ina ware ba 'ta' ma warenaa a'a ei otalai nenerana ba ronei alaginia. <sup>8</sup> Ei rama'a, rona hanana ma ronamina magu. Hinene, ei otalai nenerana, rona paiaa olorompalo pa, na pepesu ei dufuu du'ua. <sup>9</sup> Ina pa'i ale'ei gunaroa pufaba'a wawane yei. I alodigaa ro'ou, <sup>10</sup> na hugi pafuu wa a'a ei otalai nenerana ma dinaa fawelei Dalmanutha.

*Ei Pharisee, Rona I'igainaa Hepalo Foigia  
(Matthew 16:1-4)*

<sup>11</sup> Ei Pharisee, rona nomai ma rona'aa fiharei a'a Jesus. Si'ei ba ro'aa mania, rona i'igainaa ba nei fama'aa ro'odu hepalo foigia i norai pafea. <sup>12</sup> Inamina fawenaitemu ma ware, "Tani taweni ro i'igainaa hepalo hilalaa foigia ba unei fama'aa ro'ou? A warefa'uai a'a hamu'ou, lomi ba awe fama'aa ro'ou." <sup>13</sup> Na di'ininaa ro'ou, na hugidai pafuu wa ma aununaa pepei.

*Fei Fafuafuaa ei Pharisee ma Herod  
(Matthew 16:5-12)*

<sup>14</sup> Ei otalai nenerana, rona madi'inia ba ro'aa notoo faraa pidaua ma'uua, rona pa'i hepalo faraa pidaua a'a ro'ou pafuu wa. <sup>15</sup> Jesus na aweinaa ro'ou, "Oma'ama'a. Hamonei oma'ama'a hamu'ou a'a fei fafuafuaa ei Pharisee ma Herod."

<sup>16</sup> Rona fiwareinaa fei ma ware, "Woro ei i ware ale'ei uaa ba lomi ona pa'i faraa pidaua."

<sup>17</sup> Na apa'idigaa ei fiwareiaa ro'ou, na i'igainaa ro'ou Jesus, "Tani hamu'ou fiwarei ba lomi hamona pa'i faraa pidaua? Ana hamotapo'o fanunu'apa'ia? Na waiwai tabaa hamu'ou?

<sup>18</sup> Hamona pa'i pudaa hamu'ou ma ana lomi

hamona'u fanunupa'i ma na pa'i adiaa hamu'ou ma ana lomi hamona'u guaipa'i? Ma ana lomi hamona'u nonominia? <sup>19</sup> Ei a bidigedigeaa haipaniei faraa pidaua a'a ei haipani pufaba'a, hefiga pa na pepesu a'a ei masii faraa pidaua hamona tonia?"

Rona ware, "Hefua ma guapalo."

<sup>20</sup> "Ma ei a bidigedigeaa ei olorompalo faraa pidaua a'a ei gunaroa pufaba'a, hefiga pa na pepesu a'a ei masii faraa pidaua hamona tonia?"

Rona ware ba, "Olorompalo."

<sup>21</sup> Ina warenaa a'a ro'odu ba, "Ana hamotapo'o apa'ia?"

*Hemea Pudawerai Yei Bethsaida nawe  
Fanunupa'i*

<sup>22</sup> Rona sufudai Bethsaida ma hefi'a rama'a, rona dugamii hemea pudawerai a'a Jesus ma i'igifawe'i a'ana ba inei idoia. <sup>23</sup> Na tauaa panii mei pudawerai ma noduginaa hia auguu fei gufu. I huwidigaa pudaa mei rama'a ma audigaa panina pafona, Jesus na i'igai, "Ona fanunupa'i hepalo manumanu?"

<sup>24</sup> Na aranaa pa'udu ma ware, "Na fanunupa'i rama'a; rona fafanunu ale'ei haihai, rona tatalai."

<sup>25</sup> Jesus na augaa panina hepoadiai pudaa mei rama'a. Si'ei, fei pudana na wera ma na fanunupa'i ma fanunufarawanipa'aa minaa ei manumanu. <sup>26</sup> Ba i alohadiwe'idinia humuna, Jesus na ware, "Apuna famaua gufu."\*

*Peter na Ware ba Jesus, Hia Mei Christ  
(Matthew 16:13-20; Luke 9:18-21)*

---

\* <sup>8:26:</sup> 8:26 Hefi'a ne'ia ba Apuna wi warefanaa hemea i gufu

<sup>27</sup> Jesus ma ei otalai nenerana, rona aununaa ei gufu papaa Caesarea Philippi. I ma'aa tala, ina i'iginaa ro'odu, “Ei rama'a, rona ware ba yau hini?”

<sup>28</sup> Rona ware, “Hefi'a, rona ware ba yoi John, mei Pudugufaia; hefi'a ba Elijah; ma hefi'adai ba hemea ei mamama'a.”

<sup>29</sup> Ina i'igai, “Ma hamu'ou? Hamona ware ba yau hini?”

Na ware Peter ba, “Yoi, mei Christ.”†

<sup>30</sup> Jesus na aweinaa ro'odu ba ronei'aa ware-fanaa nemea ba hia hini.

*Jesus na Ware'augaa fei Ma'eana  
(Matthew 16:21-28; Luke 9:22-27)*

<sup>31</sup> I dii, na feroinaa ro'odu ba mei Na'uu Rama'a, neipa'aa tonaa fi'ina a'a watauda manumanu ma ro'aa ofadugia ei bauaniala gufu, ei famamoaa humuu mei Haidaa mawe ei feroiaa law. Ma hefi'a, rowe fo'afama'eia ma nenee oduai arewaa, i asi'adai. <sup>32</sup> Ina fa'arewaiaa feni ma Peter na dugitata'ainia ma warehota'ia.

<sup>33</sup> Ma'uaa i momo'ai ma fanununaa ei otalai nenerana, na hota'aa Peter, “Dinaa neneu, Satan! Lomi ona pa'i naranaramu a'a ei manumanuu mei Haidaa, ma'uaa ei manumanuu rama'a.”

<sup>34</sup> Ma ina haronaa a'ana fei gupuu rama'a mawe ei otalai nenerana ma ware ba, “Hini ba i nenerau, inei rawa'a'afai a'a ei nunumiana, tonaa fei hawafolona ma nenerau. <sup>35</sup> Uaa hini ba i panarofaa fei harenuana,‡ iwe pa'ai ma'uaa, hini i

---

† **8:29:** **8:29** O, *Messiah*. “Mei Christ” (Greek) ma “mei Mes-siah” (Hebrew) hanuu guapaloei ba “Mei rona ipinaa tabana pao.”

‡ **8:35:** **8:35** Hanuna warea Greek ba *faweweni*, o *laloo naranara*; v. 36 anaa.

fapa'ainaa fei harenuana a'au ma a'a fei rawani'a warea, i tela. <sup>36</sup> Tamanu rawani'ana nabaa hemea i tonaa minaa feni malagufu ma'ua na fapa'ainaa fei harenuana? <sup>37</sup> O, tamanu i fania hemea ba i filoginia a'a fei harenuana? <sup>38</sup> Nabaa nemea na mamafa a'au ma ei wareau laloo feni au taweni, feni rona fiharoharoipa'ai ma pepesu a'a ei mau-mau hafelo, te, ana iwe mamafa a'ana mei Na'uu Rama'a ena na nomai wagii fei haweraa mei Amana fipui a'a ei apunaia alo'alo."

## 9

<sup>1</sup> Ma ina warenaa a'a ro'ou ale'ei ba, "A warefa'uai a'a hamu'ou. Hefi'a eni ro ufalarai yeni, ro'ado'o fanunuua fei haparaiaa mei Haidaa na nofininaree fei faufau, nene rowe ma'e."

*Fei Hudi Unuu Jesus na Filogii  
(Matthew 17:1-13; Luke 9:28-36)*

<sup>2</sup> Nenee oloroa arewaa Jesus na nodugaa Peter, James ma John. Ma uniaa ro'ou, rona faneaa hepalo tarea maugen. Yei, i ma'aa ro'odu, na filogii fei maumauna. <sup>3</sup> Fei lawalawana namina po'i agime. Fei po'iana, lomi na fipupuduinaa eni fesuaa hemea yeni malagufu. <sup>4</sup> Laguna fa'arewa pudaa ro'odu Elijah ma Moses ma laguna fiware-warei a'a Jesus.

<sup>5</sup> Peter na warenaa a'a Jesus, "Rabbi, na rawani ba o'ou yeni. Ina rawani ba hai'odu bigi'aa odu-manu pale. Hepalo yoi, hepalo Moses ma hepalo Elijah." <sup>6</sup> (Lomi ina aida ba i wareaa tamanu. Ronamina ma'aufafelo).

<sup>7</sup> Ma, hepalo papalei na sufudaimai ma hawaipa'ainaa ro'odu ma hepalo lao na warerai

a'a fei papalei: "Simeni, meni Na'uu, meni yau na haguia. Guainia!"

<sup>8</sup> Ana ei ua ma ro'aa fifanunui, lomi hemeadiai rama'a a'a ro'ou, uniaa Jesus.

<sup>9</sup> Ei roi upugio a'a fei maugenii, Jesus na warefawe'i a'a ro'odu ba ronei'aa warefanaa nemea ei rona fanunuia hawina na asi'adii a'a fei ma'ea mei Na'uu Rama'a. <sup>10</sup> Rona'o to'uaria a'a ro'odu ma fiwarewarei ba tamanu hanuu fei asi'ana a'a fei ma'ea.

<sup>11</sup> Ma rona i'iginia ba, "Tani ei feroiaa Law, ro'aa ware ba rawarawa nei nomai, Elijah?"

<sup>12</sup> Jesus na ware, "Pa'aa fa'ua ba neido'o nomai Elijah ma pagihadiwe'inaa minaa ei manumanu. Tani ro'aa ne'inia ba mei Na'uu Rama'a neimina tonaa fi'ina ma hararasia? <sup>13</sup> Ma'uaa a warefanaa hamu'ou ba na nodigimai Elijah ma rona bigi'ia a'ana minaa ei manumanu ale'ei nunumiaa ro'ou, ana ale'ei ro ne'inia."

*Fei Wala'anaa fei Spiriti Hafelo a'a mei Baduu Wawane*

(Matthew 17:14-21; Luke 9:37-43a)

<sup>14</sup> Ro'aa nomai, rona fanunupa'aa ei feroiaa Law, roi fiharenii a'a hefi'adaii otalai nenera ma hefa baua gupuu rama'a. <sup>15</sup> Ana ei ro'aa fanunupa'aa Jesus minaa ei rama'a, rona ba'arofofafelo ma ponisuafinia.

<sup>16</sup> Ina i'igai, "Tamanu ei fihareniaa hamu'ou a'a ro'ou?"

<sup>17</sup> Na ware hemea dupuaa ro'odu, "Mena feroia, una dugamii meni na'uu, baduu wawane, meni na wadu'ia pigea. Ma fei pigea, nafafanaonaa laona ma lomi na wareware. <sup>18</sup> Ena inafane'o guafia, na bainafa'inia malagufu. Ina pugapugaa poana,

fi'u'uinaa difona ma na waiwai ununa. Una i'igainaa ei otalai neneramu ba ronei fawala'ania ma'uaa lomi rona hawia.”

<sup>19</sup> Jesus na ware, “Hamu'ou ena rama'aa taweni, lomi na we'i naranaraa hamu'ou. Ipo'o pedu nahaiga fena maumau hamu'ou ale'ena? Dugifanamiau mena baduu.”

<sup>20</sup> Si'ei, rona dugialao ma i fanunupa'aa Jesus fei pigea, maduare ua na fa'a'erapurapuaa unuu mei baduu. Ina pasincaa malagufu, weloweloi ma na pugapugaa poana.

<sup>21</sup> Jesus na i'igainaa mei amaa mei baduu, “Figa malaa gutanana ale'eni?”

Ina ware, “Ena ifi badui <sup>22</sup> nopa'amii wagieni, ina'o suminia hafi o ranu ba i fo'afama'eia. Ma'uaa nabaa ona hawia ba o bigi'aa he'a manumanu, te, faloloa'inaa hai'ou ma hadumaa hai'ou.”

<sup>23</sup> Jesus na ware, “Ei wareamu ba, ‘Nabaa una hawia’? Minaa ena manumanu na ma'atalaa a'a hini na we'i naranarana.”

<sup>24</sup> Ana ei ua, mei amaa mei baduu na haroharo ba, “Na we'i naranarau. Hadumau a'a feni naranarau, fena lomi na we'i!”

<sup>25</sup> Ma i fanunuia Jesus ba roi ponimai fawelei a'ana, ei watauda rama'a, na warehota'aa fei spiriti hafelo,\* “Mena pigea, mena lotoo adia ma umuloo, a warefanio, wala'amai a'ana ma onei'awe wadu'aidinia.”

<sup>26</sup> Fei pigea na aimemewai, na fa'a'erapurapuaa ununa ma wala'aa. Mei baduu na fafanunu ale'ena hemea ma'ea. Si'ei, watauda, rona ware ba, “Ina ma'e.” <sup>27</sup> Ma'uaa Jesus na tauaa panina, fa'ufalaginia ma ina ufalarai.

---

\* <sup>9:25:</sup> 9:25 Warearea Greek *spiriti loloa*

<sup>28</sup> I wadu'aidiginaa fei humu Jesus, ei otalai nenerana, rona i'iginia ei uniaa ro'odu, "Tani lomi hai'ouna fawala'apa'ia?"

<sup>29</sup> Ina ware, "Fena maumau ale'ena, i no'uamai a'a fei lafulafua."†

*Jesus na Waredinaa fei Ma'eana  
(Matthew 17:22, 23; Luke 9:43b-45)*

<sup>30</sup> Rona di'ininaa fawelei ma talaifaloginaa Galilee. Jesus lomi na nunuminaa nemea ba nei aida ba ro'ou hitani, <sup>31</sup> uaa fi feroinaa ei otalai nenerana. Na warenaa a'a ro'odu, "Mei Na'uu Rama'a, rowe aloia a'a rama'a. Rowe fo'afama'eia ma nenee oduai arewaa iwe asi'aa." <sup>32</sup> Ma'uaa lomi na arewa a'a ro'odu ei hanuiana ma rona ma'au ba ro'aa i'iginia hefei.

*Hini na Bauanai?  
(Matthew 18:1-5; Luke 9:46-48)*

<sup>33</sup> Rona dinamii Capernaum ma laloo fei humu, ina i'iginiaa ro'odu, "Tamanu fei fihareniaa hamu'odu i ma'aa tala?" <sup>34</sup> Ma'uaa ronamina babanini. Uatani, yei ma'aa tala rona fiharenii ba hini i bauanai.

<sup>35</sup> Jesus na guta ma harofaa ei hefua ma helagui ma na ware ba, "Hini i nunuminia ba hia rawarawa, neipa'aa oanaa mugi ma naffi a'a minaa ei rama'a."

<sup>36</sup> Ina dugaa hemea baduu pusu'o ma fa'ufalaginia dupuaa ro'ou. Ma a'a guapaloei panina na poro'aa mei baduu ma warenaa a'a ro'ou, <sup>37</sup> "A'a fei harau, hini i taufagutanaa hemea baduu pusu'o ale'eni meni, ina taufagutanau. Ma

---

† **9:29:** **9:29** Hefi'a ne'ia ba *lafulafua ma fabaoa*

hini i taufagutanau, abaa fi taufagutanau, ma'uaa mei na aloagiau.”

*Mei Lomi na Fadugeaa O'ou, Hia a'a O'odu  
(Luke 9:49, 50)*

<sup>38</sup> Na ware John, “Feroia, hai'ouna fanunupa'aa hemea na fawala'anaa ei pigea wagii fei haramu ma hai'ouna ware a'ana ba nei pedu, uaa hia, abaa hemea o'odu.”

<sup>39</sup> Na ware Jesus, “Apuna pauniana. Lomi hemea i bigi'aa hepalo foigia a'a fei harau ma hinene, i warefafeloau a'a hepalo manumanu.

<sup>40</sup> Uaa hini lo'e na fadugeaa o'odu, hia a'a o'ou.

<sup>41</sup> A warefa'uai a'a hamu'odu ba hini i fanio hepalo baraa ranu wagii fei harau, uaa yoi a'a Christ, pa'aa lomi ba iwe pa'ai fei pono'ana.

*Ona Fapasiaa Hemeadiai a'a fei Hafelo'a  
(Matthew 18:6-9; Luke 17:1, 2)*

<sup>42</sup> “Hini i susuaninaa nemea eni baduu pusu'o, nemea na we'i naranarana a'au, na rawani ba ro'aa habe'aa huua mei rama'a mei a'a hepalo baua mugoo ma famomoguia agi. <sup>43</sup> Na'aa fei panimu i fafeloio, lafigifamosuia. Na rawaninio ba onei pa'i hepalo ua pani ma pa'i harenuamu laraa fei ba o pa'i guapalo pani ma dinaa a'a fei hafi lomi i peretoo.‡ <sup>45</sup> Ma na'aa fei pinemu na fafeloio, lafigifamosuia. Na rawaninio ba o wadu'aitonaa fei harenuua lomi i pedutoo fininaa afetoaa pinemu a'a fei gufu pafea laraa fei ba o

---

‡ **9:43:** **9:43** Hefi'a ne'ia ba peretoo, 44yei/“‘wa'awa'a ro'ou, lomi na ma'e,/ma fei hafi lomi i peretoo.’

pa'i guapalo pinai ma i gu'aio fei hafi lomi i pere too. <sup>§</sup> <sup>47</sup> Ma na'aa fei pudamu nafafeloio, wenu'ia. Na rawaninio ba o wadu'ainaa fei haparaiaa mei Haidaa a'a hepalo ua puda laraa fei ba ona pa'i guapalo puda ma dinaa fei hafi lomi i peretoo.

<sup>48</sup> Yei,

“ ‘ei wa'awa'aa ro'odu, lomi ro'aa ma'etoo,  
ma fei hafi, lomi i peretoo.’

<sup>49</sup> Minaa ei rama'a, ro'aa agi'agia a'a fei hafi.

<sup>50</sup> “Fei agi na rawani ma'uaa, nabaa i pa'ai fei agi'agiana, o fa'agi'agi batanaidinia? Nei pa'i agi laloo iaa hamu'ou ma hamonei gutafirawanii ua.”

## 10

### *Fi'alagia*

(*Matthew 19:1-12; Luke 16:18*)

<sup>1</sup> Jesus na di'ininaa fei gufu fei ma na dinaa fawelei malalaa Judea talawa'aa fei Jordan. Ma rona nodimai a'ana hefi'a gupuu rama'a ma ale'e'i maumauna ranimai, na feroinaa ro'odu.

<sup>2</sup> Ro'aa nomai hefi'a Pharisee ba ro'aa mania, rona i'igai, “Na rawani a'a fei law ba nemea wawane i disuminaa mei harona?”

<sup>3</sup> Ina ware, “Tamanu ei di warefawe'iaa Moses a'a hamu'odu?”

<sup>4</sup> Rona ware, “Moses na ugania ba nemea i ne'inaa hepalo ne'ia ma alofatatalaina mei harona.”

<sup>5</sup> Jesus na ware, “Si'ei ba na waiwai tabaa hamu'ou, Moses na ne'ifanaa hamu'ou feni law feni. <sup>6</sup> Ma'uaa eni i mamara feni malagufu, mei

---

<sup>§</sup> **9:45: 9:45** Hefi'a ne'ia ba peretoo, <sup>46</sup> yei / “ ‘wa'awa'aa ro'ou,  
lomi na ma'e, / ma fei hafi lomi i peretoo.’

Haidaa 'na bigi'aa lagua —wawane ma pifine.'  
 7 Si'eni pa'afina ba hemea wawane, i di'ininaa amana ma inana ma fihupu'ai a'a harona\* 8 ma lagu'awe pigioinaa hepalo. Si'ei, fai lomi ba lagua helagui ma'uaa hemea. 9 Hee, tamanu mei Haidaa na fihupu'inia, nemea nei'aa alagia."

10 Ma ro'aa gutadiai laloo humu, ei otalai nenerana, rona i'igainaa Jesus a'a fei. 11 Ina ware, "Na'aa hemea wawane i suminnaa harona ma lalaina ne-meadiai pifine, ina fiharoharoipa'ai a'ana. 12 Ma nabaa mei pifine i disuminaa mei harona ma lalaidinaa nemea wawane, ina fiharoharoipa'ai."

*Ei Baduu mawe Jesus  
 (Matthew 19:13-15; Luke 18:15-17)*

13 Ei rama'a, roi dugalao ei baduu a'a Jesus ba nei idoaa ro'odu, ma'uaa ei otalai nenerana, rona pauninaa ro'odu. 14 I fanunuia ale'ei Jesus, lomi napo'o ni'eni'e. Na warenaa a'a ro'odu, "Fanoramii ro'odu a'au ma apuna pauninaa ro'odu, uaa fei haparaiaa mei Haidaa, gu-fuu ena mau rama'a ale'eni eni baduu. 15 A warefa'uainia a'a hamu'odu ba hini lomi i tonaa fei haparaiaa mei Haidaa ale'ei hemea pusu'o baduu, lomi ba iwe wadu'ai." 16 Ma ina poro'aa ei baduu, augaa panina pafuu ro'odu ma haweginaa ro'odu.

*Mei Baubara na Pa'i Watauda Manumanu  
 (Matthew 19:16-30; Luke 18:18-30)*

17 Ma ba i aunu Jesus, na ponimai a'ana hemea, na fapasi'unaa du'una i ma'ana ma i'igai, "Mena

---

\* 10:7: 10:7 Hefi'a ne'ia mina lomi na pa'i mafihupu'ai a'a harona.

rawani'a feroia, apa'aa bigi'aa tamanu ba a tonaa fei harenua lomi i pedutoo?"

<sup>18</sup> Na ware Jesus, "Tani o ware ba yau rawani'a? Lomi hemea rawani'a, uniaa mei Haidaa. <sup>19</sup> Ona aida fei Law: Apuna fo'afama'e, apuna fiharo-haroipa'ai, apunafafanao, apuna u'usifi, apuna susuani ma onei guainaa wareaa amamu ma inamu."

<sup>20</sup> Ina ware, "Mena feroia, minaa ena, namina fanima'aia ena ui badui nopa'amii wagieni."

<sup>21</sup> Jesus na fanununaa a'ana ma na haguia. Ina ware, "Hepalo manumanu otaa pa'i. Nowau, aloaa minaa ena manumanu ona pa'i ma fanaa ena lomi rona pa'i ma owe pa'i fananamaiaa manumanu i gufu pafea. Ma ona bigidigia, nomai ma nenerau."

<sup>22</sup> A'a ei, na nafa'aa paruna. Na aunutonaa faloloa'iana uaa na pa'i watauda manumanuna.

<sup>23</sup> Jesus na diarai ma warenaa a'a ei otalai nenerana, "Na pa'aa waiwai a'a ei rona pa'i watauda manumanu ba ro'aa wadu'ai a'a fei haparaiaa mei Haidaa!"

<sup>24</sup> Ei otalai nenerana, rona ba'arofo a'a ei wareana. Ma'uaa Jesus na warediai, "Ena na'uu, a warefanaa hamu'odu ba napa'aa waiwai wadu'aiaa fei haparaiaa mei Haidaa!"<sup>†</sup> <sup>25</sup> Na maduta a'a fei camel ba i wadu'aipa'i laloo fei ma'ahi'u laraa mei i pa'i watauda manumanu ba i wadu'ainaa fei haparaiaa mei Haidaa."

<sup>26</sup> Ei otalai nenerana, rona ba'arofo'apoidiai ma fiwarewarei, "Na'aa ale'ei, hini i tela?"

---

<sup>†</sup> **10:24: 10:24** Hefi'a ne'ia ba napa'aa waiwai a'a ena rona au naranaraa ro'ou a'a ei mugoo po'i!

<sup>27</sup> Jesus na fanununaa a'a ro'ou ma ware, "A'a rama'a, lomi na ma'atalaa ma'uaa, abaa ale'ei a'a mei Haidaa, uaa minaa ena manumanu, rona ma'atalaa a'ana."

<sup>28</sup> Peter na warenaa a'ana, "Hai'ounamina rawa'a'afinaa minaa ei manumanu ba hai'ou nenegio."

<sup>29</sup> Jesus na ware, "A warefa'uai a'a hamu'odu, hini i di'ininaa humuna, o lofuna, o agina, o inana, o amana, o na'una, o ei poduna, uaa ba i nenerau ma fei rawani'a warea, <sup>30</sup> i tonaa ale'ena hefa pu'udiai a'a feni au feni (ei humu, lofu, agi, ina, na'u ma podu-ma'uaa ei haperararaia ro nofinimai a'a e'ei) ma wagii fei au i nomai ro'aa tonaa fei harenua lomi i pedutoo. <sup>31</sup> Ma'uaa watauda, ena ro'ou rawarawa, ro'awe dinaa nene ma ena mugi, ro'awe oanaa ma'a."

*Jesus na Waredinaa fei Ma'eana  
(Matthew 20:17-19; Luke 18:31-34)*

<sup>32</sup> Ro'ei talainaa Jerusalem, Jesus na aimaa ma ei otalai nenerana, rona maduofo ma'uaa ei rama'a, ei ro'aa nenegia, rona ma'au. Na dugi'u'uginaa ei hefua ma helagui ma na warefanaa ro'odu tamanu rowe bigi'ia a'ana. <sup>33</sup> Ina ware, "O'aa dinaa Jerusalem ma mei Na'uu Rama'a, rowe fifaninia panii ei famamoaa humuu mei Haidaa ma ei feroiaa law. Rowe dududuia ba nei ma'e ma fifaninia a'a ei Gentile <sup>34</sup> ma rowe hararasinia, huwia, hafugia ma fo'afama'eia. Nenee odu'ai arewaa iwe asi'aa."

*Fei I'igaiaa James ma John  
(Matthew 20:20-28)*

<sup>35</sup> Si'ei James ma John, laguei na'uu Zebedee, laguna dinamii a'ana. Laguna ware, "Mena feroia, haiguna nunuminio ba onei bigi'ia a'a haigua fei i'igaiaa haigua yoi."

<sup>36</sup> Ina i'igai, "Tamanu fei ba a bigi'ia a'a hamugua?"

<sup>37</sup> Laguna ware, "Onei fagutanaa hemea haigua i pepei ma'aumu ma hemea, i pepei mauwimu a'a fei haweramu."

<sup>38</sup> Na ware Jesus, "Lomi hamuna apa'aa tamanu ena hamu'ei i'igainia. Haa, hamu'aa hunupa'ia fei bara, fei una hunumia ma hamu'aa pudugufaipa'i a'a fei pudugufaiaa fi'ia, fei una pudugufai wagina?"

<sup>39</sup> Laguna ware, "Haiguna hawia."

Na ware Jesus, "Hamu'aa hunupa'ia fei bara, fei ba a hunumia ma pudugufaipa'i wagii fei pudugufaia yau na pudugufai wagina, <sup>40</sup> ma'uua fei ba hamu'aa guta pepei ma'au o mauwiu, abaa manumanuu ba a ugainia. Ei gutana ei, na udediginaa gutaa ei rama'a ei rowe tonia."

<sup>41</sup> Ro'aa guainia ei hefua, rona siba a'a James ma John. <sup>42</sup> Na harofipuinaa ro'ou Jesus ma ware, "Hamona aida ba ei pa'aa famamoaa ei Gentile, rona fasuinaa ei maroaa ro'ou ma ei paniaa panii ro'ou, ana rona fasuinaa ro'ou. <sup>43</sup> Abaa ale'ei a'a hamu'odu ma'uua, hini ba i bauanai a'a hamu'ou, inei nafii a'a hamu'ou <sup>44</sup> ma hini ba i rawarawai, inei humuwai minaa ei rama'a. <sup>45</sup> Uaa ena i nomai mei Na'uu Rama'a, ana abaa ronei nafii a'ana ma'uua ba hia, nafi ma ba i fanaa fei harenuana ale'ena ponoponoo watauda."

*Bartimaeus, mei Pudawerai na Fafanunupa'i  
(Matthew 20:29-34; Luke 18:35-43)*

<sup>46</sup> Rona dinamii Jericho ma ba ro'aa di'ininaa fei gufu Jesus ma ei otalai nenerana fipuinaa fei baua gupuu rama'a, hemea pudawerai, harana Bartimaeus (mei na'uu Timaeus, baduu wawane) na gutanoinoi papaa fei tala. <sup>47</sup> Ma i guainia ba fi nomai Jesus, mei Nazareth, na una'aa ma haroharo, “Jesus, mena Na'uu David, faloloa'inau!”

<sup>48</sup> Watauda na hota'ia ma ware ba nei babani ma'uua na haroharo'a-poidiai, “Mena Na'uu David, faloloa'inau!”

<sup>49</sup> Jesus na u ma ware, “Harofia.”

Si'ei, rona haronaa a'a mei pudawerai ba, “Onei ni'eni'e! Ufalarai! Ifi harofio!” <sup>50</sup> Na suminaa fei hawana, na pala'arofonaa pinena ma dinamii a'a Jesus.

<sup>51</sup> Na i'iginia Jesus, “Tamanu nunumiamu ba a bigi'ia a'amu?”

Mei pudawerai na ware, “Rabbi, nunumiau ba a fanunupa'i.”

<sup>52</sup> Na ware Jesus, “Nowau. Fena we'iaa narraramu na farawaninio.” Ana ei ua, na fafanunupa'i ma na talaineneraa Jesus wagii fei tala.

## 11

*Fei Baua Ni'eni'ea a'a fei Wadu'aiana  
(Matthew 21:1-11; Luke 19:28-40; John 12:12-19)*

<sup>1</sup> Ro'aa rafi'inaa Jerusalem ma dinamii Bethphage ma Bethany yei Maugenii Olive, Jesus na aloaa helagui otalai nenerana <sup>2</sup> ma na ware a'a lagua, “Dinawii a'a fena gufu i ma'aa hamugua

ma ena hamuna wadu'ai, hamu'awe fanunupa'aa hepalo baubara donkey, rona habe'ia yena, fei lomi hemea na u poni pafona. Alagia ma forai-mai yeni. <sup>3</sup> Ma na'aa nemea i i'igainaa hamugua ba, ‘Tani hamu'aa bigi'aa feni?’, warefania, ‘Mei Fasu na nunuminia ma lomi i madii iwe alo-hadiwe'inamai.’”

<sup>4</sup> Laguna aunu ma laguna pa'aa fei baubara donkey yei ano, i ma'aa tala, rona habe'ia a'a fei talaa wawadu'i. Lagu'aa alagia, <sup>5</sup> hefi'a rona ufalarai yei, rona i'igai, “Tani hamu'aa alaraa fena baubara donkey?” <sup>6</sup> Laguna ware ana ale'ei ei wareaa Jesus a'a lagua. Ma lomi rona papa'aa lagua. <sup>7</sup> Ma lagu'aa forai-aloo fei baubara donkey a'a Jesus ma suminaa ei hawaa lagua pafona, ina guta pafona. <sup>8</sup> Watauda, rona hafeninaa ei hawaa ro'odu i tala ma hefi'a, rona hafeninaa ei raraa haihai, ei balaiaa ro'ou podu. <sup>9</sup> Ei rona aimaa'ma ei rona nenegia, rona haroharo,

“Hosanna!”\*

“Haweginaa mei i nomai a'a fei haraa Mei Fasu!”

<sup>10</sup> “Haweginaa fei haparaiaa mei amaa o'ou David, fei fi nomai!”

“Hosanna i pafea!”

<sup>11</sup> Jesus na wadu'ainaa Jerusalem, dinaa a'a fei humuu mei Haidaa ma didiarainaa minaa ei manumanu. Ma si'ei ba namina fafidii, na asi'aa ma aunufipui a'a ei hefua ma helagui, dinaa Bethany.

---

\* **11:9: 11:9** Warea Hebrew. Hanuna do'o fama'a ba “tela!” I dii, nawe oanaa hepalo warea udugia; v. 10 anaa

*Ina Umuaa fei Haihai Figi  
(Matthew 21:18, 19)*

<sup>12</sup> Fei arewaa augu ei roi di'ininaa Bethany, na bao Jesus. <sup>13</sup> Ina fanunupa'aa hepalo haihai figi, na raua ma'ida, namina habe mamaugi. Si'ei, na aunu ba i ma'a ba na pa'i fuana, o lomi. I nopa'alao, na ma'apa'ia ba lomi fuana, uaa abaa au fuaiaa ei figi. <sup>14</sup> Si'ei, ina warenaa a'a fei haihai, "Lomi nemea ba i hananadinaa fuamu." Ma ei otalai nenerana, rona guainia ei fi ware.

*Jesus na Famama'aa fei Humuu mei Haidaa  
(Matthew 21:12-17; Luke 19:45-48; John 2:13-22)*

<sup>15</sup> Ro'aa pa'aa Jerusalem, Jesus na wadu'aina malalaa fei humuu mei Haidaa. Ma na una'ateteaa ei ponopono'a ma ei alo'aloa yei. Ina hadupoponaina ei tawaa ei filogia mugoo po'i ma ei gutanaa ei roi alo pune, <sup>16</sup> ma na apunainia ba nemeadiai nei'aa talai'ailao i malalaa fei humuu mei Haidaa ma notonaa ei manumanuu aloa. <sup>17</sup> Ma ei fi feroinaa ro'ou, ina ware, "Haa, lomi rona ne'inia ba:

" 'Fei humuu, ro'awe roroinia ba  
hepalu humuu lafulafua a'a minaa ei gufu  
pedu'?

Ma'uua hamu'ou, hamona fafaia ale'ena 'o'opa'ai ena fafanao.' "

<sup>18</sup> Ei famamoaa humuu mei Haidaa ma ei feroiaa law, rona guainaa fei ma una'aa ma labaginnaa hepalo tala ba ro'aa fo'afama'eia, uaa rona mama'au a'ana, hamatee minaa fei gupuu rama'a, ronamina malefa a'a ei feroiana.

**19** Inofafilao, rona† asi'aa a'a fei baua gufu.

*Na Hole fei Haihai Figi  
(Matthew 21:20-22)*

**20** Mafufuo, ei roi talailao, rona fanunupa'aa fei haihai figi namina ma'epa'ai, ei warana ama'anaa no'una. **21** Na nonominia Peter ma na warenaa a'a Jesus, "Rabbi, ma'aia! Fei haihai figi, fei ona umuia, na ma'e!"

**22** Jesus na ware, "Narafawe'i‡ a'a mei Haidaa. **23** A warefa'uai a'a hamu'ou, nabaa nemea i warenaa a'a fei maugen'i ale'ei ba, 'Aunu, wi siminaa ana yoi agi,' ma lomi na hamamagua fei naragnarana ma'uaa napa'aa we'i naranarana ba fei wareana i bigipa'i, iwe bigipa'i a'ana. **24** Si'ei, a warefanaa hamu'ou ba tamanu i'igiaa hamu'ou wagii fei lafulafua, narafawe'i ua ba hamona todigia ma iwe oanaa manumanuu hamu'ou. **25** Ena hamona ulafulafu ma na'aa hamona pa'i pidawiaa hamu'ou a'a nemeadiai, futoaa hafelo'ana ba mei Amaa hamu'ou pafea ana i futoaa ei hafelo'aa hamu'ou."§

*Rona I'igainaa fei Foraforaa Jesus  
(Matthew 21:23-27; Luke 20:1-8)*

**27** Rona hadiwe'idimai Jerusalem ma ei fi tata-lai Jesus i malalaa fei humuu mei Haidaa, ei famamoaa humuu mei Haidaa, ei feroiaa law ma ei bauaniaa gufu, rona nomai a'ana. **28** Rona i'igai,

---

† **11:19:** **11:19** Hefi'a ne'ia mina ba *hia*   ‡ **11:22:** **11:22** Hefi'a ne'ia mina ba *Nabaa ona narafawe'i*   § **11:25:** **11:25** Hefi'a ne'ia ba *ei hafelo'aa hamu'ou*. **26** *Ma'uaa naba lomi hamona futoaa hafelo'aa nemeadiai, ana lomi ba mei Amaa hamu'ou pafea i futoaa ei hafelo'aa hamu'ou.*

"A'a tamanu forafora ba o bigi'aa eni manumanu eni? Ma fanaa hini yoi feni forafora ba o'aa bigi'ia?"

<sup>29</sup> Jesus na ware, "Ana a i'igainaa hamu'ou hepalo i'igaia. Do'o warefanau ma awe warefanaa hamu'ou ba a'a tamanu forafora ba a bigi'aa eni manumanu. <sup>30</sup> Fei pudugufaiaa John—norai pafea, o nomai a'a rama'a? Ware fanau!"

<sup>31</sup> Rona fiwareinia dupuaa ro'odu ale'ei ba, "Nabaa o ware ba, 'Norai pafea,' iwe i'igai, 'Ma tani lomi hamona nara ba fa'ua ei wareana?' <sup>32</sup> Ma'uaa nabaa o ware ba, 'Nomai a'a rama'a'...." (Rona ma'auaa ei rama'a, uaa minaa ei rama'a, rona nara ba John, pa'aa mamama'a.)

<sup>33</sup> Si'ei, rona warefanaa Jesus, "Lomi hai'ouna aida."

Na ware Jesus, "Ana lomi a warefanaa hamu'ou ba foraforaa hini fei a biginaa eni manumanu eni."

## 12

*Fei Warea Hanunuu ei Rona Bigi laloo fei Pe'ihapee Hemeadiiai*

*(Matthew 21:33-46; Luke 20:9-19)*

<sup>1</sup> Si'ei, na warehanunuinaa ei wareana a'a ro'odu: "Hemea na faroaa hefaa pe'ihape. Na nonoifaweloinia ma agifaa hepalo huapu ba i hapi'inaa ei wine ma faduaa hepalo tarea humuu fafanunu. Si'ei, na fifaninaa a'a hefi'a ba ro'awe pono'ia ma na aununaa a'a hepalo tatalaia. <sup>2</sup> I pa'aa fei au hufu'a, na aloaa hemea nafi a'a ei oma'ama'aa fei pe'ihape ba neiree to hefi'a fuaa pe'ihape a'a ro'odu. <sup>3</sup> Ma'uaa rona panarofia,

hafugia ma alo'uaia pani ua. <sup>4</sup> Si'ei, na alodinaa hemeadai nafi a'a ro'odu; ma mei rama'a mei, rona hafugaa tabana ma fafeloia. <sup>5</sup> Ina alodinaa hemeadai ma mei rama'a mei, rona fo'afama'eia. Ina aloaa wataudadiai; hefi'a ro'odu, rona hafugaa ro'ou ma hefi'a, rona fo'afama'eaa ro'ou.

<sup>6</sup> “Na pa'i hemea dufu ba i aloia, hemei na'una, baduu wawane; mei pa'aa haguna. Na aloia nenee minaa ro'odu. Na ware ale'ei ba, ‘Ro'awe ma'auaa mei na'uu.’

<sup>7</sup> “Ma'uaa rona fiwarewarei ei oma'ama'aa fei pe'ihape ba, ‘Simeni, meni i tonaa feni pe'ihapee amana nabaa i ma'e mei amana. O dii, o fo'afama'eia ma fei pe'ihape, i udenea pe'ihapee o'odu.’ <sup>8</sup> Si'ei, rona panarofia, fo'afama'eia ma suminia auguu fei pe'ihape.

<sup>9</sup> “Tamanu naraa hamu'odu ba i bigi'ia mei amaa fei pe'ihape? I nomai ma fo'afama'eaa ei oma'ama'aa fei pe'ihape ma i fanaa fei pe'ihape a'a hefi'adai. <sup>10</sup> Haa, lo'e hamona igoaa feni ne'ia laloo fei Bu'u Apuna ba:

“Fei mugoo, fei rona suminia ei fadufadua,  
ana sifei, i oanaa fasu'ufufugoi.\*

<sup>11</sup> Mei Fasu na bigidigaa feni,  
ma namina fafanunufarawani pudaa  
o'odu?”

<sup>12</sup> Si'ei, rona lalabaginaa hepalo tala ba ro'aa panarobobo'inia, uaa rona aida ba ifi warehanunuinaa ro'odu, ma'uaa rona mama'au a'a fei gupuu rama'a. Si'ei, rona di'ininia ma aunu.

---

\* **12:10: 12:10** O, i oanaa fasuui fei fasu'ufufugoi

*Fani Mugoo Po'ii Gavaman a'a Caesar  
(Matthew 22:15-22; Luke 20:20-26)*

<sup>13</sup> Hinene, rona aloaa hefi'a Pharisee ma ei maroaa Herod a'a Jesus ba ronei labaginaa tataa wareana. <sup>14</sup> Rona dinamii a'ana ma ware, "Mena feroia, hai'ouna aida ba yoi hemea wanewanea. Lomi onafafefenaa wareaa ei rama'a, uatani, lomi ona nara ba ro'ou, rama'a bata; ma'uaa ona feroinaa fei talaa mei Haidaa a'a tamanu na fa'uai. Na rawani ba o fani mugoo po'ii gavaman a'a Caesar, o lomi? <sup>15</sup> O fani, o, onei'aa fani?"

Ma'uaa Jesus na apa'idigaa ei ware'oniaa ro'odu. Ina i'igai, "Tani hamu'ou mania ba hamo'aa fa'alabe'au? Tofanamiau hepalo denarius ma a ma'aia." <sup>16</sup> Rona tonamai fei mugoo po'i ma na i'igainaa ro'odu, "Hanunuu hini feni? Ma feni ne'ia, haraa hini?"

Rona ware, "Caesar."

<sup>17</sup> Si'ei, Jesus na warenaa a'a ro'odu, "Fanaa Caesar ei manumanuna ma fanaa mei Haidaa ei manumanuna."

Ma rona madu'ofo a'ana.

*Lalaia wagii fei Au Asi'ana  
(Matthew 22:23-33; Luke 20:27-40)*

<sup>18</sup> Si'ei, ei Sadducee, ei rona ware ba lomi ro'aa asi'aa ei ma'ea, rona nomai ma i'igainia hepalo i'igaia. <sup>19</sup> Rona ware, "Mena feroia, Moses na ne'ifanaa o'odu ba nabaa nemea lofuu hemea i ma'edi'ininaa mei harona ma'uaa lomi na'una, mei lofuu mei ma'ea nei lalaina mei haroo mei ma'ea ma nei fuaifani na'uu mei lofuna. <sup>20</sup> Te, na pa'i oloromea filofui. Mei uma'ua na lalai ma na ma'e ma lomi na'una. <sup>21</sup> Mei umugina na lalaina mei pifine, mei ma'esuabea ma mei

umugina, ana na ma'e, lomi na'una. Ana ale'ei a'a mei fa'o'oduiaa ro'odu. <sup>22</sup> Minaa ei oloromea, rona ma'e ma lomi rona difuai baduu ma nene, ana nawe ma'e mei pifine. <sup>23</sup> A'a fei au asi'anab haroo hini ro'odu mei pifine? Te, minaa ei oloromea, rona lalainia?"

<sup>24</sup> Jesus na ware, "Tani, hamo'aa poapoai? Haa, lomi hamona apa'aa fei Bu'u Apuna, o fei faufau mei Haidaa? <sup>25</sup> Ena rona asi'aa ei ma'ea, lomi ro'aa lalai o falalai; rowe ale'ena ei alo'alo pafea. <sup>26</sup> Ma a'a fei ba ro'aa asi'aa ei ma'ea—haa, lomi hamona igoia a'a fei Bu'uu Moses, ei i gu'agu'a fei haihai, na warefania mei Haidaa, 'Yau, mei Haidaniaa Abraham, mei Haidaniaa Isaac ma mei Haidaniaa Jacob'? <sup>27</sup> Abaa hia Haidaniaa ei ma'ea, uaa Haidaniaa ei rona werawera. Hamonamina tatafafelo!"

*Tamanu na Bauanai a'a fei Law  
(Matthew 22:34-40; Luke 10:25-28)*

<sup>28</sup> Na nomai hemea feroiaa law ma na guinää ro'odu, roi fiharenii. Na fanunupa'ia ba Jesus na fanifarawani warea a'a ei i'igaiaa ro'odu ma i'igainia, "A'a minaa ei law, afaia na pafeinaa ro'ou?"

<sup>29</sup> Na ware Jesus, "Fei namina pafeai, sifeni: 'Ena Israel, hamonei guinia, mei Fasu, mei Haidaniaa o'odu, hia hemea ua.<sup>†</sup> <sup>30</sup> Haguaa mei Fasu, mei Haidaniamu a'a minaa ei naranaramu ma a'a minaa ei fawewenimu ma a'a minaa ei apa'amu ma a'a minaa ei faufaumu.' <sup>31</sup> Fei fagua-paloana, sifeni: 'Haguaa mei gufumu ana ale'ei

---

<sup>†</sup> **12:29:** **12:29** O, mei Fasu, mei Haidaniaa o'ou, hia hemea ua Fasu.

ona haguiō.' Lomi hepaldiai law na muainaa guapaloeni."

<sup>32</sup> Na ware mei rama'a mei, "Mena feroia, ona warepa'ia. Na wanewane ei wareamu ba hemea ua Haidaa ma lomi hemeadiai ma'uua hia ua. <sup>33</sup> Fei ba onei hagulia a'a minaa ei naranaramu ma minaa ei apa'amu ma minaa ei faufaumu ma fei ba onei haguua mei gufumu ana ale'ei ona haguiō na mua laraa fei fagu'amu minaa ei manulelele ma minaa ei fana a'a Mei Haidaa."

<sup>34</sup> I fanunuia Jesus ba mei rama'a mei, na warepa'ia ale'ei ei i'igaiana, ina ware a'ana, "Lomi ona raua a'a fei haparaiaa mei Haidaa." Ma nenee fei, lomi nemea na laugu'ai ba i i'iginia hefi'adai i'igaia.

*Pa'aa Na'uu Hini mei Christ?  
(Matthew 22:41-46; Luke 20:41-44)*

<sup>35</sup> Ei fi wareware Jesus yei malalaa fei humuu mei Haidaa, na i'igaina ro'ou ba, "Tani ro'aa ware ei feroiaa law ba Christ,<sup>‡</sup> na'uu David? <sup>36</sup> David, a'a fei faufau fei Spiriti Apuna, ana na ware:

"Mei Fasu na ware a'a mei Fasuu:

"Guta pepei ma'auu  
hawina una aunaa ena bidibidii unumu  
haroo pinemu."'

<sup>37</sup> David, ana na ware ba mei rama'a mei, hia 'Fasu.' Tani ei ba hia na'uu David?"

Fei baua gupuu rama'a, rona guainia ma rona ni'eni'e.

*Jesus na Aweinaa Ro'ou a'a ei Feroiaa Law  
(Matthew 23:1-36; Luke 20:45-47)*

---

<sup>‡</sup> **12:35:** **12:35** O, Messiah

<sup>38</sup> Ei fi feroinaa ro'odu Jesus na ware ba “Oma'aa hamu'odu a'a ena feroiaa law. Ronafane'aida fareaa ena maleaa susu ma tatalai fawelei rona'o alo'alo manumanu ba ronei fafanununaa ro'ou ei rama'a. <sup>39</sup> Ma tonaa ena gutaa ena bauana laloo ei synagogue ma a'a ena baua hananaa rona'o guta a'a ei gutaa ena baua rama'a. <sup>40</sup> Rona fa'amoaa humuu ei pifine ma'esuabea ma ronamina lafulafu famalaa ba ei rama'a, ronei fanunuua ro'odu. Ei rama'a ale'ei, ro'awemina pa'i fagianaa ro'odu.”

*Fei Fanaa mei Pifine Ma'esuabea  
(Luke 21:1-4)*

<sup>41</sup> Jesus na guta'oma'alao a'a fei bao mugoo po'i, fei rona'o augaa ei fana lalona ma ina'o pupudaina ei ro'ei au mugoo po'i a'a fei bao mugoo po'i i humuu mei Haidaa. Watauda, ei rona pa'i watauda mugoo po'i, rona aufawatauda. <sup>42</sup> Ma hemea pifine ma'esuabea na nomai, lomi na pa'i watauda mugoo po'ina. Ina nomai ma augaa guapalo pusu'oro mugoo po'i,§ puduna ale'ena guapalo toea.\*

<sup>43</sup> Jesus na harofamii ei otalai nenerana ma ware ba, “A warefa'uai a'a hamu'odu ba mei pifine mei, na watauda ei augana laraa ei augaa minaa ei rama'a. <sup>44</sup> Minaa ei rama'a ei, rona fani a'a ei watauda manumanu rona pa'i. Ma hia na aupedugaa ma'idei hodihodiana.”

---

§ **12:42:** 12:42 Warea Greek *guapalo lepta*  
Warea Greek *guapalo kodrantes*

\* **12:42:** 12:42

# 13

*Jesus na Wareaa fei Wata'o'ooaa fei Humuu mei Haidaa*

*(Matthew 24:1, 2; Luke 21:5, 6)*

<sup>1</sup> Ei i asi'adi'ininaa fei humuu mei Haidaa Jesus, hemea ei otalai nenerana na warenaa a'ana, "Mena feroia, fanunulao! Po'o baua mugoo bata ei! Ana ronamina fananamai ei humu!"

<sup>2</sup> Jesus na ware, "Ma'a, ena baua humu ena, pa'aa lomi i ufalarai hepalo mugoo pafuu hepalo-diai. Minaa ena mugoo ena, hefi'a rama'a, ro'awe fawata'o'ona ro'ou pu."

*Ei Hafelo'a Manumanu ma ei Haperaraia*

*(Matthew 24:3-14; Luke 21:7-19)*

<sup>3</sup> Ma i guta pafuu fei Maugenii Olive Jesus, i oma'analoo fei humuu mei Haidaa, Peter, James, John ma Andrew, rona i igifagiginia, <sup>4</sup>"Warefanaa hai'odu ba i nomai nahaiga ei manumanu ei ma tamanu lalana ba na rafi'i fei au ba ei manumanu ei, ana i sufudaimai."

<sup>5</sup> Jesus na warenaa a'a ro'odu, "Oma'ama'a ba lomi nemea i sifi'aa hamu'ou. <sup>6</sup> Watauda, ro'aa nomai a'a fei harau ma ware ba, 'Yau hia,' ma ro'aa sifi'aa watauda. <sup>7</sup> Ena hamona guainia ba i pa'i fifo'aia ma ena u'uga ba ro'ei fifo'ai, apuna ma'aua. Ei manumanu ale'ei nei pa'aa nomai, ma'uua fei ia'iana ataa nomai. <sup>8</sup> Ei baua gufu ro'aa fifadugei ma hefi'a hapara anaa. I rerere feni malagufu ma i pa'i mouabiabia a'a watauda gufu. Ena manumanu ena, ale'ei ei rawarawa fi'iaa waninia.

<sup>9</sup> "Hamonei ofawee'i. Ro'awe fifaninaa hamu'ou a'a ei bauaniaa gufu ma ro'aa hafugaa hamu'ou

laloo ei synagogue. Si'ei ba hamona nenerau, hamowe ufalarai pudaa ena bauana ma ena hapaara ale'ena u'ugaa hamu'ou a'a ro'odu. <sup>10</sup> Fei rawani'a warea ido'omina dipedunaa ena gufu. <sup>11</sup> Ma ena rona panarofaa hamu'odu ma notonaa hamu'odu dududua, apuna naranara watauda ba hamo'aa wareaa tamanu. Ware'uaiaa tamanu na nomai naranaraa hamu'odu a'a fena au fena. Uaa, abaa hamu'odu ena hamona wareware, uaa fena Spiriti Apuna.

<sup>12</sup> “Hemea i aloaa mei lofuna a'a hefi'a ba ronei fo'afama'eia. Mei ama ana i bigi'ia ale'ei a'a mei na'una. Ei baduu, ro'aa una'aa ma fadugeaa ei ama ma inaa ro'odu ma aunaa ro'ou ma'ea. <sup>13</sup> Minaa ei rama'a, i bidibidi unuu ro'odu a'a hamu'odu uaa yau ma hini i narafawe'i a'au nopa'alo fei ia'iana, i tela.

### *Mei Hafelo'a*

(Matthew 24:15-28; Luke 21:20-24)

<sup>14</sup> “Ma ena hamona fanunupa'aa mei 'hafelo'a, mei ba i fafeloa fei humuu mei Haidaa' ba\* na oa laloo fei humu apuna —mei igoa nei apa'ia —ena ro'ou yena Judea, ronei ponipa'ainaa a'a ei maugen. <sup>15</sup> Nabaa nemea i pafuu humuna, inei'aa u'upuwadu'ai ba i to manumanu. <sup>16</sup> Na'aa nemea yei laloo pe'ihape, inei'awe bagua ba i tonaa fei hawaa uguna. <sup>17</sup> A'a ena arewaa ena, pa'aa famama'au a'a ena wareu ma ena roi fasusu baduu! <sup>18</sup> Lafulafu ba fei au ponipa'aia nei'awe nomai laloo fei au baua maunu o lalarena, <sup>19</sup> uaa laloo ena arewaa ena, i pa'i baua hafelo'a. Ena baua hafelo'a ena, lomi na u pa'i ei i famamaraa

---

\* **13:14:** **13:14** *ba hia*, v. 29 anaa

feni malagufu mei Haidaa nopa'amii wagieni ma lo'e i fai pa'idiai. <sup>20</sup> Nabaa lomi i faweleguinaa ei arewaa ei mei Fasu, lomi nemea i tela ma'uua, si'ei ba rona guta ei rafeiana, mei Fasu i faweleguinaa ei arewaa. <sup>21</sup> A'a fena au fena, nabaa i nomai nemea ma i ware a'amu ba, 'Ma'a, Christ,<sup>†</sup> hia yeni,' o 'Hia simei' apuna guainia. <sup>22</sup> Uaa ena sifisifi Christ ma sifisifi mamama'a, ro'awe nomai ma bigi'aa ei hilala ma foigia ba ro'aa sifi'aa ei apunaia na'aa na ma'atalaa. <sup>23</sup> Hamonei ofafaufau, uaa na warefanidigaa hamu'odu ei manumanu rotawe nomai.

*Fei Noramiaa mei Na'uu Rama'a  
(Matthew 24:29-31; Luke 21:25-28)*

<sup>24</sup> "Nenee fei hafelo'a a'a ena arewaa ena,  
"fei halo i roroma,

fei puda, lomi i fanaa fei we'aina;

<sup>25</sup> ei pi'u, ro'aa pasigai pumanugawe,  
ei manumanuu haroo pafea, ro'aa rerere.<sup>‡</sup>

<sup>26</sup> "A'a fena au fena, ei rama'a, ro'awe fanunupa'aa mei Na'uu Rama'a i norai pafuu ei papalei fininaa baua faufau ma hawera. <sup>27</sup> Ma iwe aloaa ei alo'alona ma ro'awe dugifipuipuinaa ena rafeiana a'a feni tadiwe'aiaa feni malagufu, Rai, Hafaa, Oala ma Hara'uu a'a fena ia'iaa feni malagufu ma ena haroo pafea.

*To Feroia a'a fei Haihai Figi  
(Matthew 24:32-35; Luke 21:29-33)*

<sup>28</sup> "Hamonei to feroia a'a fei maumau fei haihai figi: ena na sunaimai ei nusuna ma na pa'i rauna hamona aidadii ba fei rai na rafi'i. <sup>29</sup> Ana ale'ena,

---

<sup>†</sup> **13:21:** **13:21** O, *Messiah*    <sup>‡</sup> **13:25:** **13:25** *Isaiah 34:4*

hamona fanunupa'aa ena manumanu ena na sufudai, hamonei aida ba, na rafi'i, ana pa'aa papaa fei gigei. <sup>30</sup> A warefa'uai a'a hamu'ou ba eni rama'aa taweni§ pa'aa lomi ro'aa ma'pedeu, ro'aa ma'a minaa eni manumanu eni rona sufudai. <sup>31</sup> Fei haroo pafea ma feni malagufu, lagu'awe pa'ai, ma'uaa fei wareau, pa'aa lomi iwe pa'aitoo.

*Lomi Ona Aida fei Arewaa mafei Au Noramiana  
(Matthew 24:36-44)*

<sup>32</sup> “Lomi hemea na apa'aa fei arewaa ma fei au. Ei alo'alo yei pafea ma mei Na'u, ana lomi rona aida, ma'uaa uniaa mei Ama. <sup>33</sup> Ofafaufau ma oma'ama'a.\* Lomi hamona aida ba fei au fei, i nomai nahaiga. <sup>34</sup> Ale'ei hemea ba i tatalai rauaa. Na augaa ei nafina oma'ama'aa fei humuna. Na fani bigi'aa hememea ei nafina. Na warenaa a'a mei oma'aa fei gigei ba nei ofafaufau.

<sup>35</sup> “Si'ei ba hamonei oma'ama'a, uaa lomi hamona aida ba nahaiga na hadiwe'imai mei amaa fei humu, i nomai na fafi, o difa'u'u, na a'aroi fena a'aroo, o ba'apanii arewaa. <sup>36</sup> Nabaa i no'amai, lomi na rawani ba i nopoponinamii hamu'ou fi ma'igu. <sup>37</sup> Tamanu ena na wareia a'a hamu'odu, ana fi warenaa a'a ro'odu: ‘Ofafaufau!’ ”

## 14

*Rona Fiwarei ba Ro'aa Panarofaa Jesus  
(Matthew 26:1-5; Luke 22:1, 2; John 11:45-53)*

<sup>1</sup> Eni, dufu guai arewaa ba i nomai fei Talai Falogia ma fei Hananaa fei Faraa Pidaua Lomi

---

§ **13:30:** **13:30** O, ba eni mau rama'a ale'eni, pa'aa      \* **13:33:**  
**13:33** Hefi'a ne'ia ba ofafaufau ma lafulafu

Fafuafua. Ma ei famamoaa humuu mei Haidaa ma ei feroiaa law, rona lalabaginaa hefi'a manitoai ba ro'aa panarofaa Jesus ma fo'afama'eia. <sup>2</sup> Rona ware, "Ma'uaa, onei'aa bigi'ia wagii fei au Hananaa, uaa ei rama'a, ro'amina fisisibai."

*Fei Dufaa Pao Tabaa Jesus i Bethany  
(Matthew 26:6-13; John 12:1-8)*

<sup>3</sup> Ma yei Bethany, ei i gutafapalagi a'a fei tawa laloo fei humuu hemea, harana Simon mei Watawatai, ina nomai hemea pifine na notonamii hepalo pe'ii fei pa'aa pao dufa, bauana pono'ana ma fei pao fei, hepalo pa'aa guana pe'ihape. Ina bagu'ua ma na iginaa fei pao dufa tabaa Jesus.

<sup>4</sup> Hefi'a yei, rona siba ma fiwarewarei ba, "Tani i pedu'uaiaa feni pao dufa? <sup>5</sup> Nabaa o aloia, pono'ana i puduaa pono'aa hemea laloo he'ai igisimasi\* ma ei mugoo po'i, i dinaa a'a ei lomi manumanuu ro'ou." Ma rona sibahota'ia.

<sup>6</sup> Na ware Jesus, "Apuna papa'ana. Tani hamo'aa fa'uduguguua ununa? Ina bigi'aa hepalo pa'aa rawani'a manumanu a'au. <sup>7</sup> Ena lomi manumanuu ro'ou, hamo'aa oa a'a ro'odu ranimai ma hamo'aa hadumaa ro'ou a'a tamanu au hamona nunuminia ma'uaa yau, lomi a oa a'a hamu'ou ranimai. <sup>8</sup> Mei pifine na bigi'aa tamanu na hawia. Na igiaa fei pao dufa unuu ba i pagipagi'augau a'a fei i'ifaia. <sup>9</sup> A warefa'uai a'a hamu'odu ba ro'amina wareaa fei rawani'a warea hitani tadiwe'aiaa malagufu, tamanu na bigi'ia, ana rowe u'ugia ale'eit hanununa."

---

\* **14:5:**   **14:5** Warea Greek *pono'ana* i *muainaa odufua pu'u denarius*

*Judas na Uga ba i Aloaa Jesus  
(Matthew 26:14-16; Luke 22:3-6)*

<sup>10</sup> Judas Iscariot, hemea ei hefua ma helagui na dinaa a'a ei famamoaa humuu mei Haidaa ba i aloaa Jesus a'a ro'odu. <sup>11</sup> Ronamina ni'eni'e ei ro'aa guainia ma rona fa'unai a'ana ba ro'aa fani mugoo po'i a'ana. Siiei, ifi farerefai rawani'a au ba i fifaninia panii ro'ou.

*Fei Hananaa fei Talai Falogia  
(Matthew 26:17-25; Luke 22:7-14, 21-23; John 13:21-30)*

<sup>12</sup> A'a fei rawarawa arewaa fei Hananaa fei Faraa Pidaua Lomi Fafuafua, fei maumau ro'ou ba ro'aa apamoro'aa fei sipsipii fei Talai Falogia. Ma a'a fei arewaa fei, rona i'iginaa Jesus ei otalai nenerana, “Nunumiamu ba hai'ou re pagi'augaa gutanamu hitani ba o'aa hanana a'a fei Hananaa fei Talai Falogia?”

<sup>13</sup> Siiei na aloaa helagui otalai nenerana ma na ware, “Wadu'ainaa a'a fena gufu ma hemea na poroporo'aa hepalo baraa ranu, iwe suafinaa hamugua. Nenegia. <sup>14</sup> Ware a'a mena amaa fena humu, fena hia i wadu'ia ba, ‘Mei Feroia na i'igai, “Hitani fei gutanau ba a hanana hugiaa ei otalai nenerau wagii fei Hananaa fei Talai Falogia?”’ <sup>15</sup> Iwe fama'aa hamugua hepalo baua humu tare, na ude'audii ena manumanu. Pagi'au gutanaa o'ou yena.”

<sup>16</sup> Laguei otalai nenera na aunu, wadu'ainaa fei gufu ma fanunupa'aa ei manumanu ana ale'ei wareaa Jesus a'a lagua. Siiei, laguna pagiaa minaa ei manumanuu fei Hananaa fei Talai Falogia.

<sup>17</sup> I fafilao, Jesus na sufudaifipuimai a'a ei hefua ma helagui. <sup>18</sup> Ro'aa gutafapalagi a'a fei tawa, ina ware, "A warefa'uai a'a hamu'odu ba hemea hamu'ou i aloau, hemea fi hanana a'au."

<sup>19</sup> Ronamina faloloa'i ma hememea na ware a'ana, "A'a ba yau?"

<sup>20</sup> Ina ware, "Hia, hemea ei hefua ma helagui. Hemeni i pudigaa feni faraa pidaua laloo feni lopi i a'au. <sup>21</sup> Mei Na'uu Rama'a i aunu ana ale'ei rona ne'inaa u'ugana ma'uua, napa'aa fagiana mena i aloaa mei Na'uu Rama'a! Na rawaninia nabaa lomi na wanini."

*Fei Finei mei Fasu*

(Matthew 26:26-30; Luke 22:14-20; 1 Corinthians 11:23-25)

<sup>22</sup> Ro'ei hanana, Jesus na tonaa fei faraa pidaua, ware 'ta', bidigeia, fanaa ei otalai nenerana ma ware, "Tonia; feni, hudi unuu."

<sup>23</sup> Ma na tonaa fei bara, ware 'ta', fanaa ro'odu ma minaa ro'ou, rona hunu wagina.

<sup>24</sup> Na warenaa a'a ro'odu, "Feni, namou, feni i hupu'inaa feni† fi'ugaia, feni i wigii a'a watauda. <sup>25</sup> A warefa'uai a'a hamu'odu ba lomi a hunudinaa fei ranuu grape hawina fena arewaa na hunumanufaudinia wagii fei haparaiaa mei Haidaa."

<sup>26</sup> Ro'aa laugidigaa hepalo lauga, rona asi'aa ma aununaa fei Maugenii Olive.

*Jesus na Ware'augaa fei Waresuabaduaa Peter*

(Matthew 26:31-35; Luke 22:31-34; John 13:36-38)

---

† **14:24:** **14:24** Hefi'a ne'ia ba *feni manufau*

<sup>27</sup> Jesus na warefanaa ro'ou, “Minaa hamu'ou, hamo'aa ofadugau, uaa na ne'idii ba:

“U'a fo'afama'eaa mei oma'ama'aa sipsipi, ma ei sipsipi, ro'aa talanenei.”

<sup>28</sup> Ma'uaa nenee fei una asi'adii, awe o'a'aununaa ma'aa hamu'odu dinaa Galilee.”

<sup>29</sup> Peter na ware, “Na'aa minaa ei ro'aa ofadugio, yau, pa'aa lomi.”

<sup>30</sup> Jesus na ware, “A warefa'uai a'amu ba wagieni, hi'i, poi wagieni, atawe faguapoai<sup>†</sup> aigaa fei a'aroo, ido'o odupoai waresuabaduamu yau a'a hefi'a.”

<sup>31</sup> Ma'uaa Peter namina warefawe'i ba, “Nabaa ana a ma'efipui a'amu, pa'aa lomi awe ofadugio.” Ma ana ale'ei wareaa minaa ro'ou.

### *Yei Gethsemane*

(Matthew 26:36-46; Luke 22:39-46)

<sup>32</sup> Rona dinaa a'a hepalo pe'ihape, harana Gethsemane ma Jesus na warenaa a'a ei otalai nenerana, “Guta yeni ena na lafulafu.” <sup>33</sup> Ina dugi'uaiaa Peter, James ma John ma nawemina awata ununa. <sup>34</sup> Ma na warenaa a'a ro'ou, “Namina muainau fei faloloa'iau ma ba apo'o bima'e ua. Oa yeni ma oma'ama'a.”

<sup>35</sup> Inofaraualao ma'ida, na fapasinaa malagufu ma lafulafu ba na'aa na hawia, fei au neipo'o falogii a'ana. <sup>36</sup> Ina ware, “Abba, § O'ama. Minaa ei manumanu na ma'atalaa a'amu. Tonaa feni bara a'au ma'uaa onei'aa bigi'aa nunumiau, uaa nunumiamu.”

---

<sup>†</sup> **14:30: 14:30** Hefi'a ne'ia mina lomi na pa'i faguapoai    § **14:36:**

**14:36** Warea Aramea ba *O'ama*

<sup>37</sup> Na hadiwe'inamii a'a ei otalai nenerana ma bapa'aa ro'odu, rona ma'igu. Na warenaa a'a Peter, "Simon. Haa, ona ma'igu? Ana lomi ba opo'o oma'ama'a ale'ena heai hour? <sup>38</sup> Oma'ama'a ma lafulafu ba lomi o'aa pasinaa laloo ei manimania. Fei spiriti na nunuminia ma'uaa fei hudi unu na rafilele."

<sup>39</sup> Na aunudiai ma lafulafunaa ana fei. <sup>40</sup> I hadiwe'idimai, na bapa'idinnaa ro'ou, rona ma'igu, uaa ei pudaa ro'ou na awata. Lomi rona aida ba ro'aa wareaa tamanu a'ana.

<sup>41</sup> I hadiwe'idimai fei fa'odupoana, na warenaa a'a ro'odu, "Ana hamo'ei ma'igu ma fawenai ua? Na ha'iai! Fei auu nawe nomai. Ma'a, mei Na'uu Rama'a, rona alodigia panii ei hafelo'a. <sup>42</sup> Asi'aa! Odii! Simena fi nomai mena i aloau!"

### *Rona Patarofaa Jesus*

*(Matthew 26:47-56; Luke 22:47-53; John 18:3-12)*

<sup>43</sup> Ana fi wareware, Judas, hemea ei hefua ma helagui na sufudaimai. Rona nofipuimai a'ana hefaa baua gupuu rama'a, notonamii ei wadu ma ei hafuhafu. E'e, aloamii ei famamoaa humuu mei Haidaa, ei feroiaa law ma ei bauaniaa gufu.

<sup>44</sup> Ma mei i aloia nadii ware a'a ro'odu ba ale'ei uni'unina, "Mena una hatofaa pudana, simena; patarofia, nodugia ma oma'afarawaninia." <sup>45</sup> Ana ei i nolao a'a Jesus, Judas na ware, "Rabbi!" ma na hatofaa pudana. <sup>46</sup> Ei rama'a, rona patarofaa Jesus ma panarofia. <sup>47</sup> Ma hemea a'a ei rona ufalarai na rapu'aa waduna ma lafigifamosu'aa adiaa mei nafii mei pa'aa bauaniaa humuu mei Haidaa.

<sup>48</sup> Na ware Jesus, “Haa, una famamoaa ei hafelo'a rama'a, te hamo'aa notomai wadu ma hafuhafu ba hamo'amii panarofau? <sup>49</sup> Minaa ei arewaa, yau i a'a hamu'odu, feferoi malalaa fei humuu mei Haidaa ma lomi hamona panarofau ma'uaa fei Bu'u Apuna neipa'aa fa'uai.” <sup>50</sup> Ma minaa ei a'ana, rona ponipa'aidi'ininia.

<sup>51</sup> Ma'uaa hemea baubara na papai ua lawalawa, na neneraa Jesus. Ro'aa patarofia, <sup>52</sup> na poni'alawata ua, na ponidi'ininaa fei lawalawana.

*I Pudaa ei Bauaniaa ei Jew*

(Matthew 26:57-68; Luke 22:54, 55, 63-71; John 18:13, 14, 19-24)

<sup>53</sup> Rona nodugaa Jesus i ma'aa mei pa'aa bauaniaa humuu mei Haidaa. Ma minaa ei famamoaa humuu mei Haidaa ma ei bauaniaa gufu mawe ei feroiaa law, rona figupuimai. <sup>54</sup> Peter na nenegia, ma'uaa na raua ma'ida a'ana. Namina wadu'ai'aunulao malalaa fei humuu mei pa'aa bauaniaa humuu mei Haidaa. Na guta yei a'a ei oma'ama'aa ma fi fana'a a'a fei hafi.

<sup>55</sup> Ei famamoaa humuu mei Haidaa ma minaa ei bauaniaa ei Jew, ro'ei lalabarainaa ei tataa Jesus ba ro'aa fo'afama'eia ma'uaa, lomi rona labagipa'aa hepaloo. <sup>56</sup> Watauda na u'ufasifi ba hia ale'ei, ma'uaa ei u'ugaa ro'ou lomi na fibo'ii.

<sup>57</sup> Ma hefi'a, rona ufalarai ma fanaa eni sifisifi u'ugaa ro'ou hia: <sup>58</sup> “Hai'ouna guainaa wareana ba, ‘Awe fawata'o'ooaa feni humuu mei Haidaa feni faduaa rama'a ma laloo oduai arewaa a faduaa hepalodai, abaa faduaa rama'a.’” <sup>59</sup> Ma'uaa, ana lomi na fibo'ii ei u'ugaa ro'odu.

**60** Si'ei, mei pa'aa bauaniaa humuu mei Haidaa na ufalarai ma'aa ro'odu ma na i'iginaa Jesus, “Haa, lomi ba o wareware? Tamanu feni u'ugaa eni rama'a eni, rona u'ugio?” **61** Ma'uaa Jesus na ufamadumu ua, lomi na wareware.

Na i'igaidinia mei pa'aa bauaniaa humuu mei Haidaa, “Haa, yoi mei Christ,\* mei Na'u mei Hawegia?”

**62** Na ware Jesus, “Yau ua. Ma owe fanunuaa mena Na'u Rama'a na guta pepei ma'au Mei Faufaua, ena na nogio pafuu ei papalei pafea.”

**63** Mei pa'aa bauaniaa humuu mei Haidaa na foradigeaa ana fei susuna ma ware, “Tani o nunumidinaa hemeadihai i u'u? **64** Hamona guaidigia ba na warefafeloaa mei Haidaa. Tamanu naraa hamu'odu?”

Minaa ro'ou na ware ba na rawani ba inei ma'e. **65** Ma hefi'a, rona una'aa ma huwia; rona sumaa pudana, du'umaa panii ro'odu, fo'aia ma ware ba, “Ware unia!” Ma ei oma'ama'aa na dugia ma lapagia.

*Peter na Ofadugaa Jesus  
(Matthew 26:69-75; Luke 22:56-62; John 18:15-18, 25-27)*

**66** Peter yei fawelei pu ma hemea ei nanao nafii mei pa'aa bauaniaa humuu mei Haidaa na nomai.

**67** I fanunupa'aa Peter fi fana'ana'aiaa ununa, na fanunufa'u'ua. Ina ware,

“Yoi ana a'a Jesus, mei Nazareth.”

**68** Ma'uaa ina waresuabadunia ba, “Lomi na apa'aa ena oi wareia,” ma na dinaa poaa humu.†

---

\* **14:61:** **14:61** O, Messiah    † **14:68:** **14:68** Hefi'a ne'ia mina ba poaa humu ma na ai fei a'aroo.

**69** I fanunupa'ia yei mei nanao nafi, na warediai a'a ei ro'aa ufalarai yei, "Hia, hemea ro'odu." **70** Na suabadui-diai.

Madilao ma'ida, ei ro'aa ufalarai papaa Peter, rona ware, "Pa'aa fa'ua. Yoi hemea ro'odu, uaa yoi hemea Galilee."

**71** Inawe umuua anaia ma warefa'unai a'a ro'odu ba, "Lomi na apa'aa mena hamo'ei warewareia."

**72** Ana ei, fei a'aroo na a'aroi faguapoai.† Si'ei, Peter na nonominaa fei wareaa Jesus a'ana: "Nenee fei fa'odupoaa ofadugamu yau, i guapoai§ a'aroiaa fei a'aroo." Ina narahadiwe'inia ma na ai.

## 15

*Jesus na U i Pudaa Pilate, mei Gavanaa Rome  
(Matthew 27:1, 2, 11-14; Luke 23:1-5; John 18:28-38)*

**1** Mafufuo badu ei famamoaa humuu mei Haidaa fipuinaa ei bauaniaa gufu, ei feroiaa law mawe minaa ei bauaniaa ei Jew, ronawe pa'apa'ainaa hepalo naranara. Rona fauroro'inaa Jesus, nodugia ma fifaninia a'a Pilate.

**2** Na i'igai Pilate, "Haa, yoi mei haparaa ei Jew?" Na ware Jesus, "Hi'i. Ana ale'ena wareamu."

**3** Ei famamoaa humuu mei Haidaa, rona uni'unia a'a watauda manumanu. **4** Si'ei, na i'igidinia Pilate, "Lomi o wareware? Ma'aia. Rona ware ba ona bigifatataiaa watauda manumanu."

**5** Ma'uaa lomi na wareware Jesus ma Pilate na hawai'uaiaa poana.

---

† **14:72:** **14:72** Hefi'a ne'ia mina lomi na pa'i faguapoai. § **14:72:** **14:72** Hefi'a ne'ia mina lomi na pa'i guapoai.

*Rona Ware ba Jesus nei Ma'e  
(Matthew 27:15-26; Luke 23:13-25; John 18:39—  
19:16)*

<sup>6</sup> Hepalo maumau wagii fei Hananaa ba i ala hemea bobo'aia, mei rona nunuminia ei rama'a.  
<sup>7</sup> Hemea, harana Barabbas, hia laloo humuu bobo'aia. Hia hemea na fo'afama'e a'a fei au hefi'a na fadugedugeaa ei bauaniaa gufu. <sup>8</sup> Ei rama'a, rona nomai a'a Pilate ma i'iginia ba nei bigi'ia a'a ro'odu ale'ei ina'o bigi'ia.

<sup>9</sup> Na i'igai Pilate, “Hamona nunuminau ba a alafanaa hamu'odu mei haparaa ei Jew?” <sup>10</sup> Na aidadii ba ei famamoaa humuu mei Haidaa, rona fifaninaa Jesus a'ana uaa fei punepuneaa ro'odu.  
<sup>11</sup> Ma'uaa ei famamoaa humuu mei Haidaa, rona fa'una'anaa ei rama'a ba Pilate nei alafanaa ro'odu Barabbas.

<sup>12</sup> Pilate na i'iginiaa ro'odu, “A bigi'aa tamanu a'a mei hamona ware ba haparaa ei Jew?”

<sup>13</sup> Rona memewai, “Fatawaia!”

<sup>14</sup> Na i'igai Pilate, “Hamatani? Tamanu ei bigifatata?”

Ma ronamina memewai'apoidiai, “Fatawaia!”

<sup>15</sup> Si'ei ba i fawaneneaa ei rama'a, Pilate na alafanaa ro'odu Barabbas. Na uga ba Jesus nei to hafuhafu ma fifaninia ba nei fatawa.

*Ei Fo'aa na Hararasinaa Jesus  
(Matthew 27:27-31; John 19:2, 3)*

<sup>16</sup> Ei fo'aa, rona noduginaa Jesus laloo fei baua humuu mei bauaniaa fo'aa (harana ‘Praetorium’) ma harofipuinaa minaa ei fo'aa. <sup>17</sup> Rona farafenaa hia fei susu, pomana watolaa marawi ma roa ma rona fifigaa hepalo hogiaa tao ma fataonaa

tabana. <sup>18</sup> Ma ronawe haronaa a'ana, “Uu, mena haparaa ei Jew!” <sup>19</sup> Rona hafuhafugaa tabana a'a hepalo o ma huwia. Rona fa'unaa du'uu ro'ou ma losuinia. <sup>20</sup> Ei ro'aa hapehapeidigia, rona dudu-maa fei susu ma farafedinaa hia ana fei susuna. Si'ei, rona nodugia ba ro'aa fatawaia.

*Rona Fatawaia*

(Matthew 27:32-44; Luke 23:26-43; John 19:17-27)

<sup>21</sup> Hemea Cyrene, harana Simon, mei amaa Alexander ma Rufus, hia noranarai sugutata'aia ma fi talaifaloginaa ro'odu ma rona ware ba inei harenaa fei hawafolo. <sup>22</sup> Rona nodugaa Jesus fawelei rona ware ba Golgotha (hanuna Fawelei Guitaba). <sup>23</sup> Si'ei, rona fani numana wine na fi-hafuinaa myrrh ma'uaa lomi na hunumia. <sup>24</sup> Rona fatawaia ma alaginaa ei susuna. Ma hememea ro'ou na tonaa ei susuna a'a fei uni'uni fifigaia.

<sup>25</sup> A'a fei oduai hour (ale'ei 9 ido'o mafufuo), rona fatawaia. <sup>26</sup> Fei ne'ia ba fei tatana ale'ei:  
MEI HAPARAA EI JEW.

<sup>27</sup> Rona fatawaiaa lagueifafanao a'ana. Hemea, ma'auna ma hemea mauwina.\* <sup>29</sup> Ei rona talaifalogilao, rona hararasinia. Rona oro'oreinaa tabaa ro'odu ma ware ba, “Yoi, mena ba o fawata'o'ooa fei humuu mei Haidaa ma faduia laloo odu'ai arewaa, <sup>30</sup> nadii, upugio a'a fena hawafolo ma hadumaa ana yoi!”

<sup>31</sup> Ana ale'ei, ei famamoaa humuu mei Haidaa ma ei feroiaa law, rona hararasinia dupuaa ro'odu. Rona ware ba, “Na hadumaa hefi'a,

---

\* <sup>15:27:</sup> <sup>15:27</sup> Hefi'a ne'ia ba mauwina, <sup>28</sup> ma nawe nofa'uaimai fei ne'ia ba, “Hia a'a ei barafea” (Isaiah 53:12)

ma'uaa lomi i hadupa'aa anaia! <sup>32</sup> Mena Christ,<sup>†</sup> mena haparaa Israel, upugio eni a'a fena hawafolo ma hai'ou fanunuia ma nara ba fa'ua." Laguei, lagu'aa fatawa a'ana, ana lagunamina hararasinia.

### *Fei Ma'eaa Jesus*

(*Matthew 27:45-56; Luke 23:44-49; John 19:28-30*)

<sup>33</sup> A'a fei fa'oloroaa hour fei roromaa na hawa'onaa minaa feni malagufu nopa'alo fei fafaimpalooa hour. <sup>34</sup> Ma a'a fei fafaimpalooa hour, Jesus na aimemewai, "*Eloi, Eloi, lama sabachthani?*"—hanuna ba, "Mena Haidaniau, Mena Haidaniau, tani o ofadugau?"

<sup>35</sup> Hefi'a ei ro'aa ufalariaifarafi'i, rona guainia ma ware, "Guainia, ifi harofaa Elijah."

<sup>36</sup> Hemea na poni ma fahinumaa fei waraguua wine a'a fei hinu ma augia a'a hepalo raramanu ma fanaa Jesus ba nei hunumia ma na ware, "Apuna papa'ana. Odo'o ma'a ba i nomai Elijah ma fa'u'upuia."

<sup>37</sup> Jesus nawemina aimemewai ei fidii fawenai'apoi.

<sup>38</sup> Fei rapirapii fei humuu mei Haidaa na ba'a'anininaa guapapa, fa'ugio pa'udu ma au-nunaa pu. <sup>39</sup> Ma na ufalarai ma'aa Jesus hemea centurion. I guainaa fei aigana ma<sup>‡</sup> fanunuia batanai fi ma'e, na ware, "Pa'aa fa'ua ba meni rama'a meni, pa'aa Na'uu<sup>§</sup> mei Haidaa!"

---

<sup>†</sup> **15:32:** **15:32** O, *Messiah*      <sup>‡</sup> **15:39:** **15:39** Hefi'a ne'ia lomi na pa'i: *guainaa fei aigana ma*      <sup>§</sup> **15:39:** **15:39** O, *meni, pa'aa hemea Na'uu*

**40** Hefi'a pifine, rona ufanunumai rauaa. Dupuaa ro'odu, Mary Magdalene, Salome, Mary, mei inaa James mei baubara ma ana inaa Joses. **41** Yei Galilee eni pifine eni, ronafane nenegia ma hadumia a'a ei nunumiana. Wataudadiai pifine, ei rona nofipuimai a'ana dinaa Jerusalem, ro'ou yei anaa.

*Fei I'ifaiaa Jesus*

(Matthew 27:57-61; Luke 23:50-56; John 19:38-42)

**42** Ma fei, arewaa Pagipagia (hanuna ba, nenee fei arewaa fei, Sabbath). Ma fifafimai, **43** Joseph, mei Arimathea, hemea bauaniaa ei Jew, hemea rona ma'auia, mei ana fi guta'oma'aa fei haparaiiaa mei Haidaa, na aunufarawaninaa a'a Pilate ma i'igainaa fei hudi unuu Jesus. **44** Pilate na ba'arofo ei i guainiaa ba na ma'edii. Na harofaa mei centurion ma i'iginia ba napa'aa ma'edii Jesus. **45** I guaidigia a'a mei centurion ba pa'aa fa'ua, na fanaa Joseph fei hudi ununa. **46** Si'ei Joseph na pono'aa hepalo hawa linen, na fa'upuaa fei hudi unu, guasumia a'a fei linen ma augia laloo hepalo huapu, ei waduaa ro'odu a'a ei na'a. Ma na piguaa hepalo mugoo poaa fei wawadu'ii fei huapu. **47** Mary Magdalene ma Mary mei inaa Joses, laguna fanunu'u'umaa fawelei rona fahainopia.

# 16

*Fei Asi'ana*

(Matthew 28:1-8; Luke 24:1-12; John 20:1-10)

<sup>1</sup> I pedu fei Sabbath, Mary Magdalene, Mary mei inaa James mawe Salome, rona pono'aa ei pao dufa ba ro'aa hapigaa fei unuu Jesus. <sup>2</sup> Pa'aa mafufuo a'a fei rawarawa arewaa fei hefapagipagia, nene ua fei anaa halo, ro'ei talai'ama'anaa fei huapu <sup>3</sup> ma rona fi'i'igai, "Hini i piguua fei mugoo a'a fei wawadu'ii fei huapu?"

<sup>4</sup> Ma'uaa ro'aa aralao, rona fanunupa'aa fei baua mugoo na pigudii. <sup>5</sup> Ro'ei wadu'ailao a'a fei huapu, rona fanunupa'aa hemea baubara, susuna po'ia, na guta i pepei ma'au ma rona ma'au.

<sup>6</sup> Ina ware, "Apuna ma'au. Hamo'ei lalabaginaa Jesus mei Nazareth, mei na fatawa. Ina asi'adii! Hia lomi yeni. Ma'a, fawelei ro'aa fudigia yei. <sup>7</sup> Ma'uaa aunu ma warefanaa ena otalai nenerana mawe Peter ba ina aunudiginaa Galilee i ma'aa hamu'odu. Yena hamo'aa fanunupa'ia, ana ale'ei idii wareia Jesus a'a hamu'odu."

<sup>8</sup> Ei pifine, rona ma'aufunurere ma poni'asi'aa a'a fei huapu. Lomi rona wareaa hepalo manumanu a'a hemea, uaa ronamina ma'au.

*Jesus na Fa'arewa a'a Mary Magdalene  
(Matthew 28:9, 10; John 20:11-18)*

<sup>9</sup> Jesus, i asi'aa foi a'a fei rawarawa arewaa fei hefapagipagia nado'o fa'arewa a'a Mary Magdalene, mei hia na fawala'anaa olorompalo pigea a'ana. <sup>10</sup> Ina aunu ma warefanaa ei rona oa a'a Jesus fama'a, ei roi faloloa'i ma ai'ai. <sup>11</sup> Ro'aa guainia ba Jesus na mama'adii ma Mary na fanunupa'ia, lomi ronapo'o nara ba fa'ua.

*Jesus na Fa'arewa a'a Helagui Otalai Nenerana  
(Luke 24:13-35)*

<sup>12</sup> Hinene, na u'ugaidiai fei maumau Jesus, ei i fa'arewa a'a helagui ro'ou, ei lagu'ei tatalai yei sugatata'aia. <sup>13</sup> Laguna hadiwe'ai ma warefanaa ro'odu; ma'uaa ana lomi ronapo'o nara ba fa'ua.

*Jesus na Fa'arewa a'a ei Hefua ma Hemea  
(Matthew 28:16-20; Luke 24:36-49; John 20:19-23; Acts 1:6-8)*

<sup>14</sup> Hinene, ei roi hanana, Jesus na fa'arewa a'a ei hefua ma hemea ma na hota'aa ro'odu, uaa lomi na we'i naranaraa ro'odu ma na waiwai tabaa ro'odu ma lomi ronapo'o nara ba fa'ua ei wareaa ei rona fanunuia nenee fei asi'anana.

<sup>15</sup> Na ware a'a ro'odu, "Hamonei aununaa a'a minaa ena gufuu feni ano ma wareaa fei rawani'a warea a'a minaa ena rama'a. <sup>16</sup> Hini na we'i naranarana ma i pudugufai, iwe tela; ma'uaa hini lomi na we'i naranarana, iwe to lagina. <sup>17</sup> Ma a'a ena rona narafawe'i wagii fei harau, i bigipa'i eni hilala eni: ro'awe fawala'anaa ena pigea, wareaa manufau wareagufu, <sup>18</sup> panarofaa ei wa'a hafelo ma ena rona hunumaa ei numa, ei na pa'i siafa wagina, lomi i fagianapa'aa ro'odu; ro'aa augaa panii ro'ou pafuu ei funua ma farawaninaa ro'ou."

*Mei Haidaa na Duginaa Jesus Pafea  
(Luke 24:50-53; Acts 1:9-11)*

<sup>19</sup> I warewareddii a'a ro'odu mei Fasu Jesus, mei Haidaa na duginaa hia pafea ma fagutania pepei ma'auna. <sup>20</sup> Ei otalai nenerana, rona aunu ma wareaa fei rawani'a warea a'a minaa ei gufu tadiwe'aia. Ma mei Fasu na bigifipui a'a ro'odu ma fa'arewaiaa ei wareana wagii ei hilala.

**Wuvulu Manufau Fi'ugaia  
The New Testament in the Wuvalu-Aua Language of  
Papua New Guinea  
Nupela Testamen long tokples Wuvalu-Aua long  
Niugini**

copyright © 2004 Wycliffe Bible Translators, Inc.

Language: Wuvalu-Aua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 11 Nov 2022 from source files dated 22 Nov 2019

fa91fc57-dbb6-5be2-bed0-2ae5e341066c